

國

朝

文

匯

國朝文匯乙集目錄

卷四十

龔景瀚 號海峯福建閩縣人乾隆辛卯進士官甘肅蘭州府知府有文辭

堅壁清野議

送朱梅崖師歸里序

林烈女小傳

洪朴 字素人安徽歙縣人乾隆辛卯進士官直隸順德府知府

蘊山先生詩序

東園記

李君傳

尤世楠 字文叔號獨谷江蘇元和人恩貢生嘉慶初為舉孝廉方正

王通論

仇巨川 字少澹一字通洲號竹與廣東順德人著有初竹齋集

蕭曹丙魏相業論

家監紀公傳

一
五
六
七
七
八
十
十一
十二

錢 澄 字東注號南園雲南昆明人乾隆辛卯進士官通政司副使

涂二餘靜甯紀事詩序 十四

常熟趙氏復兜觥敘 十四

南池彭公墓誌銘 十五

孔繼涵 字體生一字誦孟號莊谷山東曲阜人乾隆辛卯進士官戶部主事有徵波謝遠書

廣三游論 十七

算經十書序 十七

答譽客文 十九

張母吳太孺人墓誌銘 十九

汪志伊 號稼門安徽桐城人乾隆辛卯舉人官至閩浙總督

常熟楊氏祭田讀書田二記之序 二十一

吳 騫 字槎客浙江海甯人貢生有愚谷文集

雪軌詩序 二十二

游龍池山記 二十二

游張公洞記 二十三

涉園修楔記

二十四

夜明竹記

二十五

張渚鎮重修獨山關侯祠記

二十六

婺源令馮君傳

二十七

貞孝吳媛誄

二十八

國朝文匯乙集卷四十

堅壁清野議

龔景瀚

竊惟邪匪滋事以來蔓延四省。輾轉兩年。處處有賊。處處需兵。負固則經年累月不能克。奔竄則過都歷郡不能禦。議者惟以兵少為辭。於是調鄰省增新兵。募鄉勇。但謂以多為貴。不知其無益而反有害也。何則。國朝經制之兵。本屬有限。而腹裏尤少。其重兵所在。非番回錯雜之區。則形勢要害之地也。一調不已而至再。再調不已而至三。備禦空虛。奸民因而肆志。是無事之區。又將滋事。即如四川湖北之兵。皆以全赴苗疆。邪教遂乘機起事。豈非明效大驗乎。此調兵之害也。倉卒募兵。但取充數。非市井無賴之人。即窮苦無聊之輩。紀律不習。技藝不精。心志不齊。膽氣不壯。遇賊惟有紛然鳥獸散耳。此增兵之害也。鄉勇守護鄉里。易得其力。若以從征。皆非所願。無室家妻子田廬墳墓之足繫其心也。平居未受涓滴之恩。臨難責以身命之報。於勢既有所難能。而為之長者。素昔等夷。本無上下之分。與以虛名。強相鈐制。於心又有不服。故加恩則玩而驕。執法則忿而嚙。求其約束而整齊之者難矣。其藉此為利。浮開名數。冒領銀糧者。又無論也。至於臨陣既未習乎戰鬪。疑則易變。又各自為步趨。紛則易亂。即或誘之以重利。鼓之以大義。而有勇無剛。能暫而不能久。聞然而進。

亦開然而退耳。此鄉勇之害也。且兵勇多則糧餉廣。糧餉廣則轉運難。國家帑藏充盈。糧賊安民。雖千萬在所不計。而民間之疲於輓輸。困於差徭者。不知凡幾矣。文報有站。糧運有臺。軍營之移徙。使節之往來。其夫馬不能不資於民力。近地不足。調之遠處。州縣雖官為給償值。而例案所銷。豈能敷用。每縣夫數百名。馬數十匹。道途之費。守候之費。津貼之費。司事者口食之費。皆派之於下。不肖生監。又從而乾沒其中。為日既久。民力竭矣。官吏但顧考成。一切以軍興法從事。科歛督責。民必不堪。事變滋起。或遇水旱之災。將何以處之。况乎將領不能約束兵丁。所過甚於盜賊。鄉勇從而效尤。激而生變。是所憂者。不獨在邪匪也。然使有濟於事。僥倖成萬一之功。亦不必過為疑慮。而自去年以來。其情形大概可見矣。四川之山層崖峭壁。削立如城寨者。所在多有。其上有田有水。賊若據之。非數萬之衆不能攻取。然周圍百餘里。或數十里。終未能環而圍之也。竭力仰攻。士卒損傷過半。幸而得之。賊已乘間率衆他徙矣。則又窮日夜之力以追之。而其勢常不相及。蓋賊因糧於民。無地非民。則無地非糧。官兵之糧。必須轉運。賊竄無定向。亦無定期。糧臺豈能預設。夫馬豈能預增。倉卒移營。糧必遲誤。此一難也。賊皆輕身。登降便捷。而我兵鳥槍弓箭。火藥鉛彈。身所佩帶。不下二三十斤。行走不易。此二難也。賊皆本地之人。慣於山行。婦人孺子。亦趨捷若飛。而

我兵如陝甘等處壯健有餘輕捷不足登山半日汗流氣喘未遇賊而先困矣此三難也賊隨時隨地可以休息而我兵行必按隊止必安營挖壕樹柵守卡站牆日夜不得安歇此四難也賊常飽而我兵常饑賊常逸而我兵常勞勝負之勢已分矣幸而勝之所殺者賊之後隊數十百人或其老弱疾病不能行者其首逆及全夥不可見也賊之詭計又分布數人於左右十餘里中四面放火使我兵疑畏不敢遽進及至探明而賊踪已遠矣此尾追所以常不及也於是有謂宜繞道前進迎頭截殺者究係空言無實濟也前後夾擊則左右分馳東西並攻則南北各竄山澗重疊道路分歧處處可通頭頭是道安所得十餘萬之兵一一迎而擊之即令兵多將厲四面兜圍而賊眾聚而衝我散而守十餘萬之兵分布於周圍數百里之內其勢既分其力亦薄賊以全力捨命衝突亦未有不潰而出者故賊之往來可以自如我之進退反不能自主賊合而我兵不得不分賊分而我兵遂不能復合焚掠裹脅賊愈殺而愈多疾病死亡兵日添而日少剿則無以為守守則無以為剿城池已存在堪虞將領惟斤斤自保今日之賊無論非今日之兵所能歲事即或額兵全來新兵已練而使之追逐千里之餘奔馳半月之久力疲氣沮其勢又為今兵之續賊勢益張兵氣益餒日延一日事恐不可問矣然則為今之計將奈何曰賊未至巴州而巴州之民

先去賊未至通江而通江之城已空。守土之官雖欲効死勿去。其誰與守。此無他。民心無所恃也。故殺賊以安民也。今必先安民。然後能殺賊。民志固則賊勢衰。使之無所覓骨。多一民即少一賊矣。民居奠則賊食絕。使之無所據掠。民存一日之糧。即賊少一日之食矣。為今之計。必行堅壁清野之法。責成地方官。巡行鄉邑。曉諭居民。團練壯丁。建立堡寨。使百姓自相保聚。併小村入大村。移平處就險處。深溝高壘。積穀繕兵。移百姓所有積聚。實於其中。賊未至則力農貿易。各安其生。賊既至則閉柵登陴。相與為守。民有所恃而無恐。自不致於逃亡。別選精銳之兵二三千名。以牽制賊勢。不與爭鋒。但尾其後。賊攻則救。賊退則追。使之進不得戰。退無所食。不過旬餘。非潰則死耳。不戰而屈人。策之上者也。其要必先選擇良吏。一省之中。賢而能者。道府豈無數人。牧令豈無二十餘人。其奔走趨事。明白勤幹者。佐貳豈無數十人。今川省賊所往來。川東惟夔州一府。達州一州。川北惟保寧順慶二府而已。陝西惟興安一府。商州一州。河南惟南陽一府。湖北惟荊州宜昌施南襄陽鄖陽五府而已。所屬牧令賢者。留之不肖者易之。每處各派佐雜數人。分任其事。以一道府董局事。佐以正佐數員。講明利弊。議定章程。總其大綱。其餉道府分路經理稽查。不過三月。可以畢事。其次則相度形勢天成之險。如大成寨太平寨等處者。加卑因高。使之可守。移附近民居。

於其中先藏積穀。貧者官貸其資。茅屋草棚聽其便。其故居仍留勿毀。賊未至時。仍可照常安業也。其村莊市鎮。人烟湊集。如臨江市。普安場等處者。隨其所居。因山臨水。為築城堡。外挖深濠。務令高廣。民居零星在外者。移入之。甃石木料匠役之費。皆給於官。惟丁夫取於民。有貧乏者。量給口糧。以代賑恤。其次則選擇頭人。山上之寨。平地之堡。人戶既多。一切事宜。需人經理。擇其身家殷實。品行端方。明白曉事者。或紳監。或者民舉為寨長堡長。給以頂帶。予以鈴記。使總一寨一堡之事。其清查戶口。董視工程。經管銀糧。稽查出入。訓練丁壯。修飭守備。別擇數人為之副。各就所長。分任其事。以崇責成。其次則清查保甲。戶口繁多。奸良莫辨。外至者虞其為間諜也。即久居者亦慮其有匪黨也。行保甲之法。十家聯保。互出甘結。始准移居。匪類送官究治。其踪跡可疑。尚無確據者。另附冊尾。聽其另居。自便。毋使溷入。以滋後累。其餘良民。悉使團聚。家有幾人。大小幾口。所操何業。田土若干。詳註冊內。以備稽核。其次則訓練壯丁。每戶抽壯丁一人。或二三人。編為部伍。鳥槍刀矛。各習一技。官為給優。製備器械。每一堡寨。擇營中千把。或外委一員。兵三四名。使之教導。勤加訓練。有事則登陴守禦。自保鄉里。毋令出征。惟本州縣有警。或隣堡告急。許以其半救援。其次則積貯糧穀。堡寨之中。建倉數間。富家囤戶。有糧難以盡移者。官給銀悉行收買入倉。

無者買於隣近各鄉官兵經過即以此糧供支賊至閉寨壯丁守陴按名給糧毋令家食其鰥寡孤獨貧乏殘疾及家稍充而實無糧者准其照冊分別賑借賊平之後即為本鄉社倉分貯常平一遇災歉亦可就近賑耀其次則籌度經費所有築堡挖壕建倉買糧製備軍械一切守禦器具及搭棚蓋屋之費銀皆官給交堡寨長司其出入惟倉糧之數主於官賑借供支官為報銷其餘銀勻攤於堡寨居民所有田地分為十年或八年隨地丁徵還如此者有十利焉川省無土著之民五方雜處其性輕於去就故一聞警報輒四散奔逃民心疑懼則千里無堅城矣今堡寨林立聲勢聯絡民居既安民志自定父母妻子一家團聚無流離死亡之憂並不慮為賊逼脅陷於邪黨可以保全良民潛消賊勢其利一也糧皆藏於堡寨之內所餘村落店館皆空屋耳賊即十里焚掠無所得食若攻圍堡寨則丁壯自護身家其守必力又有隣堡之救援官兵之策應其力必不能攻陷狂奔十日非潰而四散則輟轉於溝壑之內而區區首惡何難就擒可以制奔竄之賊其利二也據險之賊不能不下山掠食今民皆團聚糧不露處冬春之交野無青草附近已無所掠遠出則近山之堡寨皆得避而擊之其勢又不敢出坐困月餘積糧既竭終亦歸於死亡逃散而已可以制負固之賊其利三也州縣之有鄉村如樹之有枝葉枝葉傷則本根無所庇鄉村皆

為賊所蹂躪其城郭之不亡者僅矣。今四面皆有堡寨障蔽擁護賊必不敢輕犯城郭。有急則環而救之如手足之捍頭目。賊將腹背受敵况官兵又乘其後乎。可以保障州縣其利四也。堡寨遠者相距數十里近者或十餘里官兵經過就近供支糧臺可以不設官無轉運之費民無輓輸之勞至文報往來尤關緊要堡寨之在大路者即安設夫馬遞送無須兵勇護之可以省台站之費其利五也。每省挑選精兵三千賊合亦合賊分亦分牽制其機使之不得攻陷城堡足矣其餘悉令歸伍所省鹽糧猶其小者也。兵少則差徭亦省民受無窮之利而營伍不至空虛亦無虞再生他變其利六也。守陴壯丁惟賊至時數日給以口糧耳無按月之鹽糧無安家之銀兩也其費較招募鄉勇所省何啻天淵而愛護鄉里朝夕相見猶有古者守望相助之意可以情法維繫之不若鄉勇從征日久習於兇暴怯公戰而喜殺掠釀為將來無窮之隱憂其利七也。堡伍時相糾察而堡寨之長又從而稽查之則奸宄無所容其桀驁不馴如啗嚙者亦懾而不敢肆可以漸化為良民其利八也。邪教蔓延為日既久伏而未動者正不乏人今取患既分居不相雜其冥頑者苟潛入於賊黨可以一併殲除其愧悔者必安居乎故業可以保全身命絕後患之萌開自新之路其利九也。規模既定守而勿失遠近一體上下同心如網之在綱有條不紊如身之使臂無令不從

無事之時。按籍而稽。瞭如也。有事之時。畫地而守。井如也。一勞永逸。數世賴之。其利十也。然而愚民可與樂成。難以慮始。因循目下。畏難苟安。此議一出。必有阻之者矣。一則曰。騷擾反以累民也。夫擇利莫若重。擇害莫若輕。賊匪所過。焚燒房屋。殺戮人民。擄掠婦女。其慘極矣。民雖至愚。亦必明於利害。所全者大。即小有騷擾。猶當毅然為之。況保其身家。全其積聚。順其情之所樂。何累之有。若云奉行不善。則官吏之過。當易其人。不當廢此法。如戰場失利。豈以偶無良將而遂永不用兵乎。一則曰。迂緩不切於事也。夫欲速則不達。自去歲以來。各省所行者。何一不速。何一有效。事固有不急急於目前。而收功於異日者。及今為之。未為晚也。行之一縣。可保一縣。行之一府。可保一府。同時並舉。不過三月。賊在網羅之內矣。是速莫速於此也。舍此以圖。其果有旦夕奏效。操券而得之策乎。一則慮其費大也。夫成大事者。不惜小費。苟能平賊。即多費亦所不惜。今州縣大者。不過堡寨數十處。小者十餘處。一省所辦者。不過三四十州縣耳。累多益寡。合計每省。不過用銀一百萬兩而已。自是即無所費。較之養兵養鄉勇。每月需銀百萬者。其費何如。且尚未有底止也。且惟買糧為費。較鉅而糧分貯於堡寨。何異貯於州縣之倉。今各州縣豈能不採買乎。其餘借項。分年帶徵歸款。是不獨省費。且並無所費矣。一則慮其繁難也。夫天下無難為之事。患無任事之

人今自道府下至堡寨之長總理者有人分任者有人勞瘁不辭纖悉具舉何慮其繁難且通江巴州儀隴賊所蹂躪之處失業難民豈能不為撫恤清查戶口修理房屋弔生卹死賑乏周貧其繁難何止十倍於此與其補救於已然之後何如豫備於未事之先願平心而熟計之也是數說者皆不足以難之然則今日急務莫有先於此者矣安民即所以殺賊民懼賊而逃猶可言也兵愈增則差徭愈重師愈久則擾累愈多數月之後恐民之見賊將不逃而合之矣今不早為後悔無及謹陳一得之愚伏維垂採幸甚

送朱梅崖師歸里叙

文章之道見以天者也赤子之啼笑草木之榮落風雷之鼓搏候蟲時鳥之變聲天下之至文存焉無他其天全也天者人之所不能與也亦人之所不能外也人所不能與故愛憎取舍是非毀譽爵賞刑辱無一足以動其中人所不能外故雖小夫豎子其素所不快之人至久而論定亦不能昧其心之所同然孔子曰知我者其天乎孟子曰盡其心知其性則知天矣文之與道非有二也學文之與學道非二事也莊子曰強哭者雖悲不哀強怒者雖嚴不威強親者雖笑不和謂其不真也真者精誠之至也所以受於天也自然而不可易也毋有人之見者存斯可謂精誠矣不得乎天

而湛於人偽。其於道也。渺矣。求其文之工。不可得也。吾師梅崖先生。有道者也。居深山之中。無求於人。人亦無求之者。讀書談道。求有得而已。不以徇人也。作為文章。以自娛悅。辭必自心出。而與古為會。集周秦漢唐宋元明諸家之所長。而卓然自成其言。當其始。學者相傳。以為怪。雖其族戚友朋。嬉笑不免。而先生不顧也。既而取科第。入史館。歸老於其鄉。德隆望崇。大集風行海內。學者望之如泰山北斗。蓋幾於昌黎之在唐。永叔之在宋矣。而先生仍不顧也。浩浩然落落然。存其天而已。今讀先生之文。其指事數言。窮極情狀。如造物賦形。大小高卑。各得其理。其伸縮出沒。斷續離合。如晦冥百變。頃刻殊狀。其氣淵然。其味盎然。清微寥渺。醇古淡泊。如四時元氣流行天地間。湯湯穆穆。使人知其然而不能言其所以然也。嗚呼。至矣。景翰嘗稱聞先生之論文也。以自得為宗。而教人讀書也。以盡其心為要。夫自得者。仁也。盡其心者。所以求仁之方也。仁者。吾心之天也。天體物而不可道。故四時百物。無非教也。仁體事而無不在。故鈞弋射御。無非道也。以此讀先生之文。思過半矣。昔者昌黎之門。實有籍湜諸子。東坡頴濱南豐。皆永叔門下士也。昌黎之集。李漢叙之。六一之集。東坡叙之。景瀚庸劣。何足以知先生。然坐井而觀天。其所見者。不可謂之非天也。入寶山者。空手而回。舉其形似以示人。是亦足以自蒙矣。先生主翫峯者有年。一旦忽以疾去。

諸生有不釋然者。故為之本於天以明之。雖然。先生既全乎天矣。而景滿猶不能已。於是言也。毋乃猶有人之見存也哉。

林烈女小傳

林烈女名娃。閩縣人。少失父母。撫於叔父。許嫁同里張天章。未婚而天章咯血死。死之數月。媒氏來議姻。其叔父叔母方密語私室。女行竊聽之。得天章死狀。驚而失足。叔父出問。笑而謝。眾不疑也。次夕。既寢矣。忽起束髮作高髻。其妹問故。以他辭誑之。夜視之。則女自經死矣。初。女聞天章之病亟也。微以詞問其叔母曰。咯血可死人乎。叔母知其意。漫曰。是多不死。死者偶耳。語久之。有言及未同牢為不成夫婦者。女長嘆曰。有是哉。嘻。吁而起。至是遂死。天章之死。以八月二十六日。而女死於十一月之三日。友人鄭天錫其鄰也。云天章死旬日。女猶浼所善鄰媼往問疾。媼不以實對。故其死相去數月云。論曰。守節可也。死過矣。雖然。不死將奪其志矣。烈女薨之熟矣。或曰。未婚而守。禮乎。曰。此聖人所不言。而可以義斷者也。婚禮未三月。廟見而女死。歸葬於女氏之黨。謂其未成為子婦也。然吾未聞三月之中。不幸夫死而可以改嫁者也。如曰。未成夫婦也。則兩姓之好。成於媒妁。告於廟。祖宗鑒之。親族知之矣。使不足為據。先王何為以虛文欺人。然則夫婦之義。豈必成於同牢合卺之際哉。曰。禮何以

無文曰禮者衆人所易知易行而不責以所難先王謂是聽有志者之自為之不可以概衆人也伯夷叔齊未嘗為商臣也而餓於首陽王蠋未嘗為齊臣也而絕脰於盡執是律天下之人踐土食毛孰非臣子易姓改代之際當無子遺之民矣然以是而反謂夷齊與蠋之不執於正則豈可訓哉世之論此者衆矣拘禮者反詆訶其事是不樂成人之美者也而矯之者又或失其平余故因烈女之事而備論之使後有所考焉

□蘊山先生詩序

洪朴

聲音之道與政通矣。詩歌之盛與樂通矣。古人以詩通於樂。以樂通於政治。蓋其為人也溫柔敦厚。詩教也。以溫柔敦厚之本。形之於詩。而通之於政。故當時歌其歡悅。而後世想其遺風。餘韻。故自魏晉六朝。及唐宋以來。其善為政者。未必皆能詩。而工於詩者。未有不善為政者也。故夫唐宋來詩人之守郡者。事與詩並傳者尤多。余又嘗怪夫造物者之於詩人也。必予之以山水名勝之地。人物佳麗之區。又使得從容以歌詠其事。而又予以賓客之極盛。若天作之合者。白之於杭。章之於蘇。劉之於隨。歐陽之於滁。東坡之於潁。於杭皆詩人之最著。而美地之最著。其詩也。其亦有山水之助也歟。然此數郡者。其守此土者多矣。其為賢守亦多矣。而其傳之最著。至於數公。則婦人孺子皆能言之。豈非詩歌之盛。尤易感人心而通之於政也哉。廬陵嘗言詩窮而後工。余謂不然。優柔平中。樂之盛也。必謂變風變雅。優於二南。二正。豈其然哉。白之於杭。章之於蘇。東坡之於潁。於杭其詩何嘗有愁苦疾急之音。而其狀人物之美。麗山川之秀絕。將使人饜飫其中。心神怡悅。而祇知其樂。奚必取於清商哀角。而後為詩也哉。盧李之奇詭。郊島之寒瘦。其詩未嘗不工。其能通之於政也哉。余之初抵楚也。即知太守蘊山之賢。而長於詩。紀君秋極顧君墨園王君少林。嘗為余誦其佳

句。而惜未見其全帙。戊戌秋。余按部至荆。試得深知蘓山之治郡。井井有條。理士民皆懷其德。撤閣後。蘓山集其詩示余。余得終觀之。而序其首曰。蘓山溫柔敦厚人也。其深於詩者也。其善為政者也。爰書於帙而歸之。

東園記

丁酉秋。余以事承乏來楚中。十月抵漢陽。得遇王君少林於驛舍。次日即至其官舍中。得遊其所為東園。遂盡觀其勝。東園地林滿一畝。依山架高。深致幽邃。林樹鬱秀。俱出於天然。橫山約疊石磯。扶緣而後上。其中或度木為閣。或剪茅為亭。層折互亞。楹角不相見。各出奇境。石洞竇孔。百變靈怪。移步易觀。令人入其中。如深山積舍。不知在城市。然而縱目遠覽。則江流帆檣。波濤上下。來往畢見。城邑闐闐。鱗鱗節次。盡攢集於其下。煙波浩渺。音聞遠稀。即江南攝山風景。不足過也。漢陽治劇任繁。為省會首邑。文書糾紛。人事應接。無閒時。若才非綽裕。將日奔走旁午。不給。奚暇留意此。然而王君幹才足辦。任事數月。不勞而理。遇難剖斷。無停滯。機復以其暇。開榛造幽。豁出勝地。使山靈不致湮沒。洵乎王君之才有餘於事也。或曰。王君非常才。行且遠。豈能得東園而久居。奚亟亟營此。余應之曰。君子一日居其官。則思盡其事。士大夫視官舍如傳舍。則日就弛廢。王君之必欲葺東園而名之。豈為一人之耳目是娛。

亦將以賴其後。其居心治事不苟如此也。名區勝境待人而後顯。王君足以傳東園。非王君藉東園而傳。王君博學工詩。為江南名士。今又為賢令。公事之餘。雅歌不輟。而同時守斯土者。則嘉興紀君秋樞亦英偉而長於詩。司馬顧君牧原大賢也。諸君皆將歌咏東園之勝。某為之圖而朴為之記。

李君傳

君姓李。諱國棟。字示章。號魚石。明嘉靖中。自湖北遷湖南之衡陽北鄉七里站。居五世為君父。諱良通。有陰德。君生八歲而孤。伯兄國柱長君二歲。家素貧。依母銀太孺人學書。稍長就塾學。性聰敏。能博記。日誦千餘言。年二十入縣學。為名諸生。益力於學。李君英朗有至性。方少時。母銀太孺人勤紡績為業。以資生延日。君嘗惻惻發憤。自為諸生後。名譽益起。鄉人後進稍稍從君問學。君亦求友於四方。然念太孺人獨居。雖道學不敢遠。每遇人饋珍饈。味則泔然泣曰。吾母嘗茹苦食蘊。不忍獨甘旨。即緘封寄獻焉。君性仁厚。其講學誨人。必知其根底。授後進書。必先授小學性理近思錄諸書曰。此為學之本也。居母喪哀毀盡禮節。為近人所難能。鄉人或勸之曰。李君何自苦為。君悲抑不能言。意不欲以獨行掩鄉人所短。然其訓迪後子弟。則必令讀禮經。習煩苦。嘗曰。情與禮相輔。至禮教薄。情乃漓矣。於此合宗族之道尤極意聯屬。

修宗譜。鉅細遠近無遺。於遠祖墳墓。必歲時親掃祭。設奠醺合食。置祭祖規約。井井有條。理其族知有不能昏嫁者。必伙助完其事。李君長八尺餘。聲徹亮聞遠。為人忼慨簡易。色溫溫然。殺人亦畏之。嘗出遊。有羣爭者。閱然不相下。微見君未。即屏息不敢語。嘗惡俗戲博廢時生事端。多方勸。俗亦漸化。君有子曰正中。以經生中乾隆癸酉科舉人。揀發湖北用知縣。方正中赴部挑選。先一日得上選。正中意初止欲得教職。就近微祿養。及得上選將為令。乃悲不自勝。泣曰。吾父年已邁。吾偏得縣遠。不能養吾父。祇增不孝。吾不復赴部。戡掣人或勸之曰。汝誠懇如是。安知不近耶。越數日。果得湖北暫補沔陽同知。君年近八十餘。揚揚如少年。至正中官舍。嘗屢後危坐。約東偏家人內外。見家人持得錢入內舍。必問所從來。曰此為官雖卑微。不可毫髮取公家物。况取於民。告以廉俸所易。方釋問。正中治官事甚廉辦。君以四十年乙未卒。以正中官封年八十一。配趙孺人。先卒。君時年四十餘。終身不復娶。子二人。皆守其家學。孫五人。次曰瞻。君卒之前年。中甲午科湖南舉人。為歙人洪朴所得士。瞻兄弟皆能文。

論曰。士之為善於鄉者。豈無益於人哉。余聞李君以少壯力學。勉行不遠。年四十餘時。常以事宿寓舍。夜半屋空中物墜。有聲隆隆。直覆君面。諦視之。乃世所云陰陽文。

多詳釋。姻雅。君得是書。將三。四十年。益博求史傳證引。皆根據。其子正中。粹之。嗚呼。
李君果於為善哉。

國朝文匯

卷四十

九

乙
國學扶輪社印

王通論

尤世桡

三代而後儒術不一。隋文時有志復先王之道。而言行足稱者。莫如王仲淹。顧先儒以其績經貶之為僭。以其獻太平十二策。同於鼓瑟。齊門其說雖是。而未能服仲淹之心也。披其以上七制之主。追跡帝王兩京之文。作於墳典。續詩則建安七子之作。上幾風雅。頌安得不謂之僭。至元經續春秋中說續論語。不待朱子之說。而羣知其妄矣。然其詞其義。皆有關於治亂得失之故。程子取之。朱子亦不以為盡可沒也。蓋其於明德新民正誼明道之旨。雖未能推極其致。而崇王黜霸。以禮樂法度為準。其高出於荀揚無疑也。若夫行己立身。自有法度。端於出處見之。平時崇學術。尚功名。一以天下為己任。其志固在於有為也。隋文時天下合一。意欲出而用世。及帝不能用。罷歸。遂教授河汾之間。陶淑英才。以輔太平之主。楊素甚重之。勸之仕。不應。於用舍行藏之道。殆庶幾焉。必以為同於鼓瑟。齊門。抑亦過當之論矣。

蕭曹丙魏相業論

仇巨川

繼天立極者君也。而輔君以代天理物者。則惟相。伊呂周召。負手尚矣。顧其人不世出。此相業之所以日難也。雖然。居其位行其道。即有其業。而欲比隆三代。大要有四焉。曰相德相任。相度相識。以誠意不以智術。相德也。以責難不以苟安。相任也。大公無我。不挾以私。謂之相度。崇本抑末。洞悉本原。謂之相識。如此四者。復正其學術。嚴其進退。則幾矣。三代而還。語漢相者。則曰高祖開基。蕭曹為冠。孝宣中興。魏丙有聲。四人相業。亦既光昭漢史矣。考蕭之為相。守關中。薦韓信。入關收秦圖籍。靜鎮之操。加以卓識。蕭誠有之。然其遣子弟以詣軍。買田宅。以自污之類。往往挾術相欺。所謂君臣以誠意交孚者。當不如是。則相德之憾也。至其請地上林。遽受廷尉之辱。猶不能引身以退。楊龜山謂其貪冒榮寵。如持重寶。惟恐一跌。毋亦刀筆小吏。不知刑不上大夫之義。而昧進退之節也。與其病也。薦有隙之曹參。以自代。斯又深得所謂外舉不避者矣。曹之代也。一遵蕭法。治尚清淨。夫以苦秦多事之民。一旦得我無為之治。安而歌之。是猶出烈熾而沃以清冷之水也。曹亦可謂識時矣。抑知蕭之佐帝。控總馬上之治。制度多襲秦舊。先王良法美意。百不得一。曹之相在孝惠時。秦灰已冷。楚阮已平。北鵠之晨未鳴。屠牛之鋒已挫。正可有為之日。帝察參不事事。且使其

子諫之帝亦非常主矣。使曹以責難不以苟安。可縶上理。奈何酣歌廢事。坐使漢治流為雜伯。豈相任耶。殆亦由其學宗黃老。故治術止此耳。夫矯黃老之弊。必變為中韓勢也。而漢治資以之相為倚伏。故至孝宣之世。治用申韓矣。陳止齊謂宣帝刑名而魏相以嚴刻佐之。夫亦以元勳如霍子孟。良吏如趙廣漢。不幸而後人與及身各麗於罪。尚當十世宥之。八議生之。乃魏以其私憾致霍赤族。而趙腰斬。其於相度蔑如也。邱瓊山短其引許史以為重。進不以適宜也。故雖力能止無名之師。屢上災變之疏。其始不端。後莫莫焉。君子惜焉。繼弱翁而相者丙也。迹其問牛喘不問羣闕一事。時人以為知大體。而君子不以為然。夫君子修己以安百姓。中和位育。民不私闕。此變理先務也。何必徵於牛。况陰陽非以拱手無為而自調者。當孝宣時。趙蓋韓楊之冤未伸。許史恭顯之勢將熾。信鳳皇。惑碧雞。種種乖政。不可勝紀。舍此不慮。而慮牛喘。豈相體乎。識之不裕故也。第自其寬大好禮。而於皇曾孫保護舊恩。絕口不言。器量可謂深矣。大抵漢承秦後。去古未遠。其所以不能復元氣於三代者。雖曰其君有以致之。而未必非輔相者其德。其任其度其識之有闕也。雖然。伊呂周召。不可再親矣。設非蕭曹畫一。與天下更始於開國之年。魏丙同心。與國運維持於中興之會。又安能位冠羣工。聲施後世哉。君子於是乎多四相矣。

家監紀公傳

家監紀者。明永明王之監軍官也。名自奇。字子珍。號曰寧庵。先世居肇郡。父夢槐。為靈山縣吏。卒於署。公年甫十五。請母扶柩歸葬。母以公年少。且乏貲。未之許。而請益力。卒能經紀其喪。致哀盡禮。雖老成練達。不是過也。承父業。史滿為廣西陸川縣典史。順治丙戌。城陷。公整衣冠。北面再拜曰。臣敢以微員自恕。而負朝廷邪。將投繯矣。令踉蹌而來止之曰。守土吾責也。死而有益於國。敢不共勉。若使人盡如北京君臣。同殉社稷。奚益乎。古有一成一旅。克復舊物者。唐桂二王無恙。既聞諸郡猶存。天下事尚可為。奈何以子之才。一死塞責耶。公領之。遂與其令歸寧。會明臣丁魁楚等。擁立永明王於郡。公以大司馬式耜。瞿公。兵科給事中邦彥。陳公薦。召對。上恢復大計。十二策。深中時要。朝廷嘉納之。授以監紀官。公於是破千金之產。以舒國用。恩威並著。深得軍心。無何。擁立諸臣。扈從與反正爭功。武臣與降賊修怨。公撫膺大慟。歎曰。悠悠蒼天。國事何竟至此也。時年四十三。遂棄官隱遁於西靈山中。初。公婚於高明。東寨譚氏。有子曰伯璋。冠矣。公至靈山。復婚於賴。連舉丈夫子三人。曰奉璋。曰顯璋。曰殷璋。杜門課子。有終焉之志。時有武弁黃學明者。聚眾於高廉間。奉明永曆年號。欲引公為重。數遣使。咨以軍事。公為之指畫形勢。授以方略。燎如指掌。薦於西師。欲

殲公。西師者。張獻忠四大部將之一。降於明者也。公逆知其無成。故不應。學明隨西師由高州出掠新興河頭。下肇慶而攻新會。道經靈山。諸部曲相戒曰。此仇監軍故里。毋得掠。有不戒者。帥斬以徇。復樹一幟於村口。以為識。左右村莊多藉以保聚云。由是仇監軍之名愈著。奈天下事。愈不可為。而公入山之想愈深。公大節之立。亦兆於此矣。康熙乙卯。滇地蠢動。改國為周。使其偽將徇定兩粵。并欲起公為參贊軍機大臣。公正色曰。使延陵將軍於二十年前。為先朝泣涕興師。號召天下。天下忠臣義士。豈無起而應之者。不此之務。今天下已定。而自圖叛逆。庸有濟乎。使者聞而急之。短於帥。帥曰。必致之。不致。則殺之。而公亦懼。終為所逼。挈家奔橫州。入耕莊以避。詎賊迹至橫州。竟為所獲。公拒之益力。遂遇害。卒年五十八。莊僕阿保隨行。回葬耕莊。時干戈道擾。長子伯璋奔喪。瀕於危者屢矣。久之乃得抵橫。尋覓母弟。還回靈山以居。茲則雲仍藩衍。分住靈嶺之間。人以為忠烈之報云。嗟乎。士君子生當亂世。而能於死生之際。較然不欺其志。倘所謂忠知兼備者。非耶。明社之屋也。死節之臣。史不絕書。顧當死而不死。謂之專。生而不勇。忠者固不為也。不必死而遽死。謂之專。死而不任。知者亦不為也。兩得其道者。則又夏夏乎難其人。使公畢命陸川。節雖高。又安有陳恢復策。受命監軍。使倉卒行在。而無燕有起色。功雖未竟。其心固已盡矣。及其匿迹。

山林甘心薇蕨不肯與賊共事。以至罹害。非識卓而力定者。其孰能之。迄今讀邵英賊數語。猶凜凜有生氣。生死之際。公可謂較然不欺其志矣。

涂二餘靜寧紀事詩序

錢澧

甲寅長夏。涂二餘來京師。出近作示澧。卷中靜寧紀事一篇。千八百字。讀竟。忽然自咎前失。始是甲辰之冬。客過湖湘。言二餘守靜寧。賊勢甚迫。城故有礮而無丸。鍛之不就。倉黃間。有十餘歲兒持三丸進。因以擊賊。城獲全。求賞其兒不可得。咸異以為神助。澧曰。此恒事也。何異之有。二餘官是土者也。神則血食是土者也。官是土者。城存與存。血食是土者。不亦念城存與存乎。況

聖人御宇。仁昭義立。德博化廣。率土人民。自其祖父以來。世沐太平之福。而運回田五。敢踵蘇四十三作孽。山川百神。度無不深恫。而思假手以效靈。特以人謀不臧。往往欲福難為功耳。靜寧之事。恒也。無足異也。今讀其詩。乃知二餘正非偶然者。其於禍之始萌也。料之明。禍將及也。備之豫。而慮之周。故其既及也。處之從容。而不擾。此猶人所能也。其能率邑諸父老子弟。惟己之從。一乃心。非素日有深所信孚於民者。其至是耶。推斯所為。則雖兵窮食竭。猶足合衆氣。以食賊神之佑之。誠非偶然。而澧始乃視之易易也。澧今年五十有五。念吾鄉交遊中。鬱屈無所於試者不少。其當百里之任。亦率不遇盤錯。無以章其利器。而二餘以是章於西。後數年。彭南池復有所以章於東。二餘長澧二歲。體貌魁梧。人望生畏。南池少澧二歲。則清羸如不勝衣。乃

憤海賊病民。地方文吏。僅僅幸其出境得免咎。因率丁壯親執梃鼓窮追出洋。幾及千里。力戰鯨浪之間。卒梟渠魁。與二餘後先仰受。

帝知今不幸南池已矣。禮當為志其墓。以為生平所抱。未施十一。使天下後世。僅僅以擊賊一節。知我南池是不幸也。二餘擢刺肅州。亦復踉蹌賴。

聖主惜其前績。使得收之桑榆。今而後不擇事而安之。竭其一誠。變化萬有。其待紀者。夫豈有量。而僅僅靜守城一節耶。或讀二餘是詩。激賞之。勸其付梓。禮亦為然者。獅子王搏象用全力者也。其搏兔亦用全力者也。觀二餘是舉。可以律其平日之處事。並可以律其後來之處事。又一一皆身所歷。與掉弄筆墨。為人作照。多所塗澤者。不啻徑庭。誠不應秘之篋中。若其詩之才力法度。與其所淵源。則從事于詩者。自能品之。不待贅言也。

常熟趙氏復兇觥叙

歲戊申秋。湘潭令趙韓軒告禮言。父者庭先生。持翁前輩。覃溪詩。詣曲阜顏氏。求其先文毅兇觥。屬禮為之。禮言是可必得兇觥于顏氏者。然侯既得而叙之。未晚比冬。果以得告。按潁陽贈文毅兇觥。史不載其事。得毋以潁陽執政後。頗與文毅諸君子接。遂並其前美畧之耶。文毅卒以兇觥于顏氏。得毋亦以潁陽與晤之故。心輕其

物不復貽子孫世守耶。然澄竊觀此一節。為文毅諸君子固難。而潁陽亦不易易事。固論所係何如也。江陵自以才足屈伸天下。所為不卹人言。亦孔多矣。一時與之持者。公私得失。或不無參半。獨聞父喪不即去位。萬萬無可解於人心。文毅諸君子爭之。豈誠可謂意氣感激。將欲借之以為不再之節耶。是天之經地之義。民之性也。此而可忍。將孰不可以忍。以故拜疏受杖。瀕於死而不計者。所以挽為人子者。無死其愛親之心也。而心悅是舉。贈物見意者。所以獎為人臣者。各盡其竭時之義也。其不共禍幸矣。由是言之。兇觥之在趙氏。亦文毅腊肉之亞。文毅之靈不歿。兇觥雖流傳百年。卒應趙氏是歸。其不先不後。自者庭先生得之者。厥亦有故焉。文毅嘗仿宋范文正為義田。貽後人矣。久之漸減。十九者庭官山左。積常俸所入。復之過半。春秋享祀。儀然如見。文毅兇觥不於者庭歸而誰歸。此又足以示為人後者奉先之孝矣。澄故不恥弁陋。作叙以應辭軒。復系之詩曰。

短喪之說。下愚所諱。始禍何人。流毒無既。父喪廿七。遽起視事。彼哉方進。謬託漢制。胡明居正。變且加厲。竟難一日。釋此權位。宋所由弱。羣狂助吠。不有君子。誰挽頽潰。炯然者心。浩乎其氣。以章民彝。物則萬世。有孫繩武。青簡並熾。宜曾宜元。孝思無隱。兇觥既得。梧棲等貴。春筵秋几。薦香達味。潁陽銘刻。應留天地。我作詩歌。用彰氣類。

南池彭公墓誌銘

讀書而求致用。未有不自治身始也。身之不治。或有所施于用。非妄即苟。故君子務先治身。然孰謂治身之勇且嚴。久而不懈。如吾南池者。竟至以葬期告也。嗚呼。南池死蓋逾年矣。天下賢人君子。為國家惜南池。稱南池。未絕於口。然人之所以惜南池。稱南池。皆以其後之建樹。而不知其所以致此之由。吾交南池垂三十年。每見未嘗不見其益進。敢不為之實紀。掩諸幽。以壽無窮。南池世為蒙化人。大母趙州蘇氏。吾師海門先生堂兄女也。先生時以清修厚德。型於鄉里。南池實仰止之。自失恃後。率從大母。依止蘇氏。以析義理。追嗜欲。為喫緊事。雖半菽不繼。不敢一介取。非其有。日把一卷。聳肩終夕。凡少年馳騁事。絕無所染。若性生然。趙州人士之有識者。靡不引重。而益退。然若不及其以貧故。姍侮之者。釋然無所於校也。吾與間隔。必歷數年。始一聚首。中間惟自辛卯之春。迄明年夏五。對牀京邸。日或易衣而出。凜然清癯。駢榮盡落。一起處之必時。一嘖笑之有節。覺是時德性已造堅定地矣。復不得志於禮部。及歲辛丑。乃以大挑例分發。試知縣舉。來補封川令。歷五年。調任香山。每一達書。無不以不變塞相。最歲在己酉。躬出洋。昂鉅盜林亞五等。以此特受。

上知授五品服。擢同知岳州。當事者。仍奏請還粵。撤署同知瓊州。專捕餘盜。遂歷諸

幽險備得情形。將見當事面陳之。疾卒于陸豐舟次。嗚呼。吾南池之為南池。豈為是區區提民役數艘。出洋集盜。畢乃忘事耶。顧不弔于天。凡思竭誠極慮。以效於朝廷者。十不展一。而遽奪其年。使世之知南池者。僅以是事。豈吾南池之幸耶。且世雖以此一事知南池。而不知其有以定其素。幾以為有天幸。則南池何樂有此知矣。方其任封川也。前政府帑幾七千。邑小而瘠。民困復不一端。為之未期年。而民信。嘗與余書言其畧。以地連粵西。盜數來往無時。緝治不力。必無以安良已。而獲連劫隣境者數盜。上官反欲抑之。慮南池欲以此見功。將必形他玩盜者罪。而不知其相時之急。此以為切務也。及後之出洋也。亦以信之結於民者深。能必民之不我戴也。其致家人書曰。吾方出洋。心知戴君目逆無賊。及其擊賊。目知有賊。心遂無洋。嗚呼。此豈無所扶持。而俸於一試者乎。凡民之所以信南池者。何也。信其身之治也。夙夜未嘗偷安。脂膏不以自潤。有必平之喜怒。無相市之話言而已。猶傳其在瓊州也。日惟啖素。未嘗進一肉味。吾知其為阿好者。稱之之過。而要其淡泊自持之素。始終不易。可見也。初娶某氏。繼娶趙州龔氏。在粵時。以尚無子。納一妾。已皆生而不育。臨終力疾啟父。請以弟之子書城為嗣。嗚呼。孰使之然夫。孰使之然夫。生卒葬年月日。別書於石。

藏諸幽。銘曰。

民之命兮。帝時思以康也。分人以政兮。孰其以為良也。正人而務自正兮。而不延其
生也。天而呼可應矣。願其致與詳也。

廣三游論

孔繼涵

昔荀悅著三游論推其弊於其原而不知所以致之者非其原之過也故廣而論之嘗竊考游之為義游蕩無薄之言也在人出入為游故雲之出岫者為游雲魚之游者曰游魚皆言在於外也今悅之言曰游使之以正行者謂之武毅其失之甚者至於為盜賊也游說之以正行者謂之辨智其失之甚者至於為詐給徒眾矣游行之以正行者謂之君子其失之甚者至於因事害私為姦宄矣吁奈何以見危授命不辱君命者之以俠客說客當之也亦相戾矣三代以降民俗日壞雖有聖明之君間出末流之故未能丕變繼其世者澆薄轉開率用脂韋詭言之人以治天下而為民牧者咸工奉上以行其私持威福之勢操切日甚而輟羣之民不能安於束縛之中於是或資勢權或依富厚而下者却以武勇下竊人心之公而行一己之私民亦自以公道之久泯今乃不獲於君上而一見於細民於是翕然稱善眾譽歸之觀者樂做其事行者逾喜其名赴人之急如償君父之仇而不知其過糜爛其家以醉時日之喪而乃快於心為之上者又不察激而致之之由惟以公膺之技擅反是非敢議朝廷雖駢首就戮曾不足以塞辜更密法度絕疑似以抑遏之不知木折者茁壯水壅者湍急人性之不可終泯致之者之原起於上也此自漢以來黨錮之與國同傾

也。悲夫。夫其為之也。始則從天下之公心。以冀其利。既亦不能自止而殉焉。此豈有定於中者。而謂見危授命者如此。與若夫游說之士。周衰而盛大。抵起於布衣。欲希富權。或從或衡。煽惑傾軋。以牽合人君。諸國之王亦無所見。盲盲貿貿。如人叱狗。不自知而為之。此皆士使諸侯。非諸侯之使士。士於其時。亦如雕陵之鵲。茂蔭之蟬。見利忘害。舍己從人。污已甚矣。何不辱之足云。至於聖人之道。則無流弊。是以董仲舒曰。弊者道之失也。然猶似有推原於道之意。蓋人失其道。而非道之失。譬之立表於庭中。日中則正。日昃則邪。同一表之影。而邪正分焉。故去影以論表。表猶是也。遂緣影以為表罪。謂影之邪。即表之邪。表任受乎道。非人不能行。人行道非道行人。故失在人而不在道。夫修身者。惟審在己者而已。至所謂游行。則求之於人。夫取古人之善行以為準。雖易地似可相符。而終不可相通。所處者異也。况博聲名為的者。與是之越而北。通燕而南也。故游俠游說之輩。早且之氣。時有離合。而游行之徒。則陽附心遠。無忌憚之甚者耳。彼道學之輩。黨人之籍。東林之衆。善惡沸騰。公私倍畔。君子豈盡取之哉。故曰。堯舜帥天下以仁。而民從之。桀紂帥天下以暴。而民從之。三代之上。無三游之民者。上之帥也。

算經十書序

禮樂射御書數周官量以司徒掌以保氏厥後秦漢政失禮樂射御微絕淪喪六書
九數為民生日用所不能廢唐以明算科取士限以年九章海島共三歲周髀五經
算共一歲孫子五替共一歲張邱建夏侯陽各一歲綴術四歲緝古三歲記遺三等
數皆兼習之試之日九章三條海島等七部各一條十通六記遺三等數帖讀十得
九為第綴術七條志云七條六條緝古三條六條十通六記遺三等數帖讀十得九
為第落經者雖通六不第是唐人為經者八綴術緝古不謂之經算經十書之名所
由起也五季孤離其科既廢迨宋而祖冲之綴術徐岳記遺重泉三等數皆亡嘉定
壬申鮑澣之復錄得記遺於汀州七竇山三茅真君觀道藏中而唐李淳風所注於
夏侯陽算取甄鸞注本今宋元豐所刊為韓延所傳無注本則是十書中經亡其一
注亡其二而三等數不數焉齊書云祖冲之注九章造綴術數十篇南史云其子暄
之更修其父所改何承天脉於是始行殆即綴術也隋志云宋末南徐州從事史祖
冲之更開圓率密法圓徑一億為一丈圓周盈數二丈一尺四寸一分五釐九毫二
秒七忽朒數三丈一尺四寸一分五釐九毫二秒六忽正數在盈朒二限之間密率
圓徑一百一十三圓周三百五十五約率圓徑七圓周二十二又設開差累開差立
兼以正圓參之指要精密算氏之最者也所著之書名為綴術宋沈括云審方面勢

股割圖記

皇朝戴震撰附

皆羽翼周髀九章者也。孫子握簡易之道。先說九九乘除分減。繼示開通之術。海島為劉徽演卷句股測量之術。張邱建因之以方程之術。會通諸法。祖冲之因之為測量天度及方圓畢立之差。王孝通因之為祖氏之辯正。而五曆則分隸以官。夏侯陽則分隸以事。五經算則分隸以經史。而胥不能稍出九章之範圍焉。嗚呼。九數之作。非聖人孰能為之哉。

答譽客文

客有晨趨來謁者。貌適適然。意謂謂然得。而告曰。子之友有閔覽範流。糾簡續臚。而以能文稱者。每布紙濡墨。握管沈思。則命若予者數輩。遷坐其旁。叩首屬目。搖顙鼓頷。此浮相譁。凌許相難。問掄於前。屈屐於後。爭乃汗顏。慍亦悞墨。凡單字呈。隻義立。固不相與繫贅。迨還而為之抽黃妃白於其間。此固言無不盡。歡無不竭。以視閉戶孤吟。冥心以思。何啻倍蓰。是以才大如海。雖若碌碌因人。實集羣言之大成也。我應之曰。噫。夫中無主。則見異恒惑。而不知即聲從味。內多愼。則是已具真。而自蹈跋後。靈前子不見夫龍之為雲乎。容裔膚寸。澶漫區宇。噓煦其氣。滂霈其施。其舒鱗布爪。夭矯蜿蜒之迹。人莫得而窺之也。又何嘗借濡沫於魚鱗。子不見蠶之作繭乎。一緒孤抽。中權自主。圓脩潔緻。光潤縝栗。足以衣被天下。而黼黻文章。裂絲藻繡。舉莫

之度越。偶有同功。終以絲芬而遭擲。子不見童豎之叱狗手。垢面蓬頭。毛髮縱縱。怔怔望望。操持跣足。呼之東則奔以東。呼之西則跳以西。叱之嘶則信信而吠。叱之闐則搶攘。賜睨而羣狺。敬其所謂。則童與狺犬皆不得而知。故免牽羊而碎推之。則一日而不可行。咫尺毋乃好奇之過。而發聲不從心也歟。

張母吳太孺人墓誌銘

自授經讀喪有無後無無主之文。而疑近俗出嗣承重之非古也。讀射義以與為人後者等之。賁軍之將。亡國之大夫。亦心疑其非倫。封建世祿之朝。重在宗社。所謂傳重受重者。則天子諸侯與后與夫人也。重在世祿。所謂為後者。則世家大夫也。今則家無世爵。世遠三古。何重可名。何後可為。曲儒不明經訓。猶且持大小宗之說。斷斷爭之。世風不古若。至於財利是重。愛嗣應嗣。輒轉膠轕。富室爭繼。乃有二後。窶子則無應者。悖經喪葬。士君子莫由辭其過矣。今於吳太孺人之狀而有感焉。太孺人先世歛人。自故明吳江縣訓導。諱延古公。始家於吳。延古生盤。太孺人之考也。太孺人年二十二。歸吳縣贈公諱經。贈公為府判。公諱岑之所出。府判公三子。長即贈公。次綬。次司獄公諱純。府判公以伯兄徵君公諱崧無子。以贈公為之子。及太孺人之婦。見維時府判公已病亟矣。厥後贈公之生墳也。司獄公亦欲以為子。太孺人請於贈

公曰。無過而預立之後。非也。然兄弟之子猶子。子婦人曷敢判而生室家之隙。及為司獄公置妾生二子。太孺人又請曰。小郎今有子且長矣。不可卒陷以非。請正其名。而司獄公以為無子而請之。有子而舍之。母乃歧兄弟之子而視之。薄歟。爭之固。迨贈公之喪。將訃。太孺人曰。是時不可不正矣。卒正之。嗚呼。即是已應書法矣。夫與為人後與之義。鄭訓為奇。言既有為者而往奇之。是貪財也。貪財已為夫子所必絕。況其人未死。而冀其無嗣。先與為之者乎。此太孺人之所不敢也。贈公既後。徵君而太孺人於府判公之喪。降服既除。猶食必蔬。襦衣不加飾者三年。人於是賢太孺人。徵君被徵於

聖祖仁皇帝朝。後者壽有聲於世。賓客日造門。凡洗腆用酒。肅賓之無缺。皆太孺人議於酒食也。吳中以裝服華侈相高尚。每見太孺人。袿衣戍削。浣濯被躬。不羨不矜。輒心媿慙而去。太孺人每以婦人職主中饋。近巨室。恥令息女知釁。歸事。教訓之不率。家政之放失。皆職是故。故徵君之子婦女子子。無敢不躬親。乾隆己丑。填官中書舍人。太孺人從賃屋。秋隘風土。既殊。親串梯。似莫能聚。舍人每懼鬱傷太孺人心。而太孺人怡顏悅澤。若惟恐舍人慮及者。吁。賢矣。乃於丙中之冬。感羸疾。逾年正月二十二日己丑卒。後贈君卒者十六年。年七十有六。兩過。卓恩以子填官。敕封太孺

人晉贈太安人子三長傳心甘肅迪化州吏目次傳中天次壘內閣中書舍人充
文淵閣檢閱四庫全書會要分校官女一通湖南平江縣知縣陳玉煒孫七孝惟孝
白孝門孝雙孝標孝彥孝康孫女一曾孫二舍人將以是年秋扶太孺人柩歸里卜
吉合葬於二十一都四圖貞山之陽以東原戴君儒術文章上被天子之知欲得其
志墓門之石以信將來以繼涵於東原先生交久介而請於東原既諾矣未幾東原
卒舍人又以迎其兄西去繼涵痛亡友之不可作兼無以塞舍人之請雖無文敢編
次其行而係之銘且附於戴氏遺書之末以資其事銘曰
賢母之生有白雉之祥而不能戕之賢母之病朕已云絕而醫者薛雪驚其若或縱
之粵承以昭其賢允婦職之罔愆既壽既考以終其天年嗚呼世之不敢入雙相之
圖者其無敢式張母之阡

常熟楊氏祭田讀書田二記之序

汪志侯

天下之最易荒蕪者莫如心田。所謂槁木死灰是也。然天下之最易生發者亦莫如心田。所謂泉達火然是也。蓋心如穀種而田則腔子。具四端統萬善道理原自森然。苟涵養其本根則滿腔之生意盎然矣。若剝削其本根則滿腔之生意索然矣。若是必去其害心者而後可以養心。養心者即朱子所云敬便在腔子裏。靜便是養得本根深也。幾見本根深而枝葉有不茂焉者哉。予於楊氏元峯徵之矣。昔子究潛政駐虞山。即聞元峯力行善事名。而元峯卒未嘗一至公門。予雖未識元峯之面而已知其心之所養者深矣。越十有三年癸亥予復來撫三吳。而元峯旋下世。其鄉之人以元峯生平孝行無間言。願請旌表。予於此又知其克盡為子之心矣。遂達於朝。以維風化不寧惟是其上而建宗祠。清祀產捐義田。葺義莊諸大端。非善繼其親之心。曷能尊祖敬宗。以睦族如此其周哉。推而下之一置祀田於麻嘉橋。一置讀書田於敦本堂。其自為計及為子孫計而務綿世澤於勿替者。非推廣其親裕後之心不至此。詩曰。孝子不隱。永錫爾類。其是之謂歟。今元峯哲嗣名景仁者。以祭田讀書田二記就正於予。予閱其規條。分明允當。儼然從方寸中畫并分疆有條而不紊。然則楊氏之祭田讀書田。即謂之楊氏之心田可也。嗟乎。心田者。子孫之苗也。得其養無

物不長。失其養。無物不消。彼世之富若貴者。或刻薄起家。或貪婪封殖。欲為子孫百世之計。其喪心幾不堪自問矣。匪特多藏厚亡。不旋踵而禍隨之。且金多心侈。徒為紈袴膏粱之子弟。作酒色播博之資。目未瞑而家已蕩然無存。是自害而并害其子孫者。或幸其一敗塗地。或譏為天道好還。子則矜其心之愚且速。而未聞君子之大道也。夫元峯之不刻不貪。彰彰在人耳目間。豈必有鑒於是而矯之歟。蓋其心田養之也深。心深則謀遠。故其治產也不為子孫之身計。實為子孫之心計。我知楊氏世子孫守祭田而為士。并食報讀書田。而登科筮仕。必且油油然生忠孝廉讓之心。即今之子孝孫賢。擢巍科居清要者。其明徵已。吾故曰。本根深而枝葉必茂也。雖然。心田者。人同賦於天地。即天地之心也。吾豈獨為楊氏言者。

雪軌詩序

吳 憲

甚矣龍山之多才也。住子讀龍山三子詩鈔。不禁擊節。三子者。蓋陸子少白。查子梅
史。南廬也。未幾而馮子補亭崛起。率偏師以摩三子之壘。三子者。亦各嚴步伍。厲艱
鞫。相與馳騁於三唐兩宋之場。凡斯四子。子皆引為忘年交。間為論序其所著。謂龍
山之秀。攬之而無遺矣。乃今復見沈子雪軌。雪軌齒差少於四子。其詩如渥洼汗血
雙瞳夾鏡。顧盼有千里意。益歎山川扶輿靈淑之氣。鍾於駿人韻士者。愈出而愈不
窮也。或問雪軌之詩。視四子果孰為優劣。曰。不知也。則何以亟稱雪軌。曰。子獨不觀
夫樂乎。鐘鋪琴瑟。笙磬祝敔。羣音迭奏。雖有先後疾徐抑揚抗墜之不同。至諧於心
悅於耳者。則一故有長言永嘆。手舞足蹈。而不自知其所以然。又豈能軒輊於其間
哉。雖然。子之於雪軌。相識較後於四子。而跡若轉密者。良以四子合并之日。而離
索之日多。且有身負沉疴。頻年困頓。不克旦暮聚首。每見近作。多憂愁佗然。非抱越
鄉之感。則切切有憂生之嗟。惟雪軌樂志循陔。足跡不出里閭。嘗慨然慕馬少游之
為人。子故得時相往還。又性喜究六法。謂詩與畫不可相離。與子尤有水乳之合。每
過子山館。必出古名跡共觀。留連移晷。所品臨率中官。鑒退而為題畫詩。環瑋奇肆。
幾與煙雲神物同其變幻。是四子以登山臨水。推襟送抱。雪軌獨借卧遊而發其性。

靈其勞逸之趣亦稍有間矣。有明嘉靖中。濟南李于麟與王元美謝茂秦徐子與諸人。稱詩極一時之盛。有前後五子七子之目。後世猶豔述之。龍山雖一隅。而英才輩出。後先相望焉。知他日不踵夫五子七子而並傳。顧惟人生如白駒過隙。聚散靡常。日月逾邁。吾又安得不三復雪帆之詩。而追思與四子曩日之周旋也。

遊龍池山記

丙辰夏四月二十有三日。晨起與燕亭景辰為龍池之遊。從桃溪覓肩輿。出月臺而東。五里至東霞埠。居民率鑿雲根為業。琢之丁丁。或載以車。聲扈鹿不絕。有龍池下院。不及叩。緣澗而南。又五里至赤山。民居數家。與人入野庵小憩。復東南行。渡石橋。初見小山數重。出沒雲際。四圍新翠如沐。更東行不數里。則龍池箸嶺諸山。皆隱隱在目。睫間矣。又七八里有平岡。遠構迤邐。曹環上皆短松。望之蔚然。如文君之肩。與黛色相參。又有諸小山。離立于平岡左右。參差非一狀。自此而前路益曠。行旋轉入茂林中。彌望蒼松翠柏。青莎叢生其下。高齊人腰。肩輿取徑。時出時沒。人語雜鳥聲。與百谷相應答。可五六里。抵山下。有亭翼然。當中路。乃捨輿而徒。進亭。林木益茂。喬柯瘦樾。危聳天矯。攀磴而上。又渡小石橋。仰不見天。更數百武。俄有日光從竹罅中出。射人襟袂。盡綠。吏道幽巖。潺湲紫行映帶。真一步一清魂也。磴盡得古招提。即禹

門禪院。壁銜唐太常崔微捨山建寺碑。寺北向。照壁有面南看北斗大字五。入山門。登閣觀。敕賜澄光寺額。蓋康熙年中所給。山僧肅客入中庭。始聞鐘聲杳杳出上方。知日停午矣。徐步前殿中庭。抄羅樹二各高七八丈。合二人抱。奇崛稍不及吾界安國寺。而蔥蒨過之。不知何時所植。景辰言二樹當枯死數十年。至天童而復生。轉從殿後登講堂。披藏經。蓋自前明及國朝兩賜本。竝存。燕亭亟從僧菟禹門寺志。舊板予與景辰躡衣而登。遍歷後院。瀟灑無點塵。至曲徑通幽。彷彿吟哦出松窗竹閣間。佇足傾聽。不覺蕭寥有遺世想。無何燕亭亦至。同禮幻有密雲等遺相。蓋茲山自二公首唱元風。恢宏象教。繼是天隱萬如。若庵玉林。皆稱後來之秀。今道響久寂矣。還至丈室。設伊蒲供。觀明時御賜瓷盃。作雨過天青色。又有金佛一軀。不及見。僧請更遊中上二龍池。會日都下春。慮腰脚不繼。辭之。於是仍尋舊徑而出。爾時天空雲淨。策短筇。渡石橋。迴眺奇峯峭壁。丹碧萬狀。視來時景象。又覺一變。憶子年二十許。嘗遊於此。遍履欽歎。如所謂白雲巖。伏虎巖。及玉陽臺。憑虛閣。分賓亭。諸遺迹。靡不覩其勝。迄今忽忽餘四十年。青山白雲。依然如故。而子雙鬢且皓然矣。釋氏電光石火之喻。不誠信然。然鄉時一意窮高極險。故於近而夷者。反若有所遺。豈山靈故留此有餘不盡。以娛予于晚景與。燕亭博學多聞。足跡半天下。遊屐所至。物無隱情。

景辰尤熟茲山掌故。而妙于語言。皆子之益友。然則茲遊之所保。不更勝於昔乎。是不可以不記也。

遊張公洞記

予既與燕亭景辰為善。推二洞之遊。燕亭復盛言張公之勝。于是興勃勃不能遏。景辰以事先歸。乃以四月二十九日。偕燕亭自長橋登舟。出城泛東。九適微雨。風逆。舟行甚緩。午後過五雲溪。訪晷畫故跡。溪故以朱藤得名。自藤花久絕。畫浪亦平。故宋陳古靈有不見藤花相掩映。鄉人猶指畫溪名之句。午後始抵蜀山。同遊三夫人廟。頗擅溪山之勝。東坡祠荒落反不逮矣。晚宿溪澗山。上下皆陶穴。層累如蜂房。中夜火光映溪流。可數鷗鷺。五月初日黎明解纜。二十里抵湖汶。使輿而北。度平曠。可三數里。遙覘四山。蓬蓬雲起。宿霧盡歛。中一峯稍高出眾山外。或曰是孟山也。復前行。臨溪得石橋。俗稱解糧。疑駕梁之誤耳。時日向午。塵壙載道。瞥見青松短壑。渡橋疾趨。無異渴驥之奔泉也。又北三五里抵道院。即天申宮故址。老氏之廬八九間。制甚陋。尋南唐韓熙載碑不得。遂出院。令土人前導。更北不半里。道旁有穹碑。四面乃湛甘泉。為史恭甫作園記。舊有亭今廢。又北遵山麓。即曾仙巖下。巖高百尺。峭崿崢嶸。作大斧劈皴。幽泉一泓出其下。味甚甘冽。泉中紫蒲綠芋。皆自生自死。巖上多唐宋

以來題字。大半為蒼鮮所蝕。與燕亭汲泉洗剔。而遍錄其不能識者。緣梯讀之。復題名石上而去。循麓稍東南。行可三百武。抵後洞。洞口東南向。不甚高。藤蘿下垂。清風冷然自洞出。若引客者。燕亭前導于尾。其後從者以次魚貫而入。進洞益涼爽。路益暗。諸人皆蛇行扶伏。螺旋以下。其隘處輒前人頂接。後人趾歷數十級。覺境稍廣而愈晦。乃敲火燃炬。始見穹窿若厦屋者。皆瑩白如雪。鍾乳四垂。五色畢具。點滴著衣袂。了無污跡。仙鼠飛鳴。下上千百為羣。聲若在鐘磬中。更折而南。百餘武。石益怪而奇。大者師象。小犬馬。飛走騰躍。又有若旌幢羽葆丹竈玉田。種種莫可名狀。却轉而右。一穴類小瓮。深黝不敢進。復南行。遇側石凝滑。不能正履。俗稱鯢魚背。同行掖予而登。俯瞰其旁。巨壑不測深淺。可方西湖紫雲洞。投以片礫。則鏗然不知其所底也。過此以往。漸逗天光一綫。乃捨炬信光而行。覺逕路漸崇。洞府益敞。而石亦益奇。辭樓下殿。不覺已及平坡。蓋即所謂燒香臺者也。臺上可坐百人。形如玉蓮花。至是天光豁然。仰眺鍾乳。垂垂若流蘇。較後洞更瓌麗。土人言張公之妙本在鍾乳。今多為陶家剽割。又洞口古枿數章。不計時代。往歲盜伐。張公遂童。皆山靈之阮也。于是由臺北躋級而上。攀藤附葛。又幾于後人頂接。前人趾矣。盤旋經數十折。始達前洞。洞口怪石撐拄。若門若閭者數重。上下四旁。古今人題字殆遍。出洞西望。善權離墨諸

峯出沒隱現於雲霞之表。遂下山。仍至湖汊登舟。則夕陽在蓬背。是夕宿丁山下。沽村醪。與燕亭炳燭細讀所錄摩崖題字。互述境歷之奇。燕亭因言昨歲是月。與友人同遊張公洞。惟是耽樓有擁擠而凝盼者。于是忿忿惟恐其返之不速。今來始得未曾有。故知攜儔挈侶。各有所當也。遂相與大笑。不覺霑醉。

涉園修禊記

涉園在海鹽縣城南三里。故給諫螺浮張先生所創。志稱烏夜村故址也。亭池林木之勝。甲於東南。而主人臨觴雅好事。又與子有連。歲甲寅暮春之初。臨觴招同人修永和故事。以子有前諾也。先是壬寅冬。子偶遊武原。購得楊忠愍公手書真跡。在請室中。寄鄭端簡公。勉以後事者。後題跋疊疊。皆名賢手筆。故為鄭所藏。自明迄今二百三十年。未嘗易主。一旦落子家。慮有所失墜。思得鄭氏之賢而歸之。懷此志蓋歲星一周矣。鄭子羹和實端簡適裔。年少有隼才。識之數年前。意謂庶幾其可託。是日羹和亦在會。即舉以歸焉。四座傳觀。會以為善。始知子有前諾者。蓋以此也。既相與流觴於居然濠濮間。酒中。子謁諸君而言曰。昔人謂典午名流。類多好清言。作達致使神州陸沈。其信然歟。曰。然。清言作達。果能致神州乎。陸沈則吾未敢以為必然也。竊謂苟清言而不至於廢務。作達而不至于妨教壞俗。庸遽足為世害哉。且如蘭亭。

一集。王謝諸公實為風雅領袖。當日一觴一咏。暢叙幽情。曷嘗不以清言作達為尚。更若羲之慕會稽山水。徜徉忘返。安石攜妓東山。流連綠竹。至于立朝政績。多有可觀。要之士君子。或出或處。其風懷氣節。故自有不同。匪若後世士習。委蛇污身穢跡。始為一切。苟一失足。則為事瓦解。為世所訕笑。而為人主者。于股肱心膂之寄。貴治亂興亡所關。尤不可不慎之耳。試觀晉簡文孝武之時。國如贅旆。安石一出。而強寇殲殄。中外乂安。明世廟委政分宜父子。姦黨恣熾。諍臣弼士。誅夷黜逐。略盡而國事遂不可問。至今讀忠愍手書。與諸公之跋。猶為之歔歔欲涕。故予嘗謂使忠愍端簡之輩。而與王謝諸公同時。故當金蘭契合。把臂入林。王謝諸公設不幸處忠愍。端簡之境。亦惟有剖心瀝膽。見危致命。正簡文所謂既與人同樂。必不得不與人同憂也。然則謂典午之清言作達。而致神州乎陸沈。夫豈為論哉。諸君咸曰。子言是也。蓋書之以告來者。俾知吾輩斯集。非徒飲食燕衍。蓋亦有知人論世之道存焉。是日也。風日清美。不減永和癸丑。諸君既觴。飲盡歡。各有所述。而予復為之記。

夜明竹記

夜明竹者。宜興邵孝子廬墓之所致也。孝子名志珪。字匡泰。宜興萬二區九苞里人也。生有至性。幼習儒術。好讀書。以家貧去而務農。養父母。弱冠時。父得危疾。志珪憂

惶不知所措。至嘗其穢。復默禱于天。剖股以進。父尋愈。又數歲無疾而卒。志珪居喪。盡禮。葬後。每夕露宿墓側。見者憐之。乃作草苫為庇。志珪晝歸田作。嘗甘旨奉母。夜必往宿墓下。風雨寒暑不少間。迨母喪畢。孺慕益切。既合葬。仍廬于墓。旦夕號泣。墓既荒僻。深林密菁。人跡幾絕。嘗有毒蛇踞其卧所。魍魎蔽于旁。志珪了不為動。又嘗暮歸。見物如羊當道。叱之起去。後人以燭至者。詢之無有也。久而夜明之竹生。竹初生。無異常產。亦不甚修偉。數月後。擇解枝幹漸枯。每夜輒有光。熒熒然若燭耀之在蔥管。碎之亦然。天雨晦。益明。自七月迄于冬始熄。于是鄰里莫不嗟異。具疏志珪孝行。請旌其廬。大吏將以入告。聞之。亟自陳堅辭。語甚懇。事乃中寢。然人以是益重志珪。蓋雍正七年也。志珪以乾隆壬戌年卒。迄今又五十餘載。罕有為之表章者。乾隆癸丑冬。竹忽復明。予求得一枝。目驗良然。藏笥中。經旬不滅。是時適重修邑乘。里人因舉其事而載之。孝友門。嗟異哉。聞諸至孝能感動天地。而致瑞應。若靈之如淡而室明。丁蘭刻木而淚出。孟仁泣竹而萌茁。王祥卧冰而鱗躍。舉憲憲在人耳目。其他醴泉甘露。珍禽異卉。尤不勝更僕數。孝經援神契曰。庶人孝則木澤茂。浮珍舒格。草秀。又按易。震為蒼筤竹。離為火。火文明之象。在豐之六二曰。豐其蔀。日中見斗。言日雖蔽于蔀。而不能掩斗之光。志珪雖自甘隱約。并晦其名。而彼蒼終不欲使泯沒。

而無傳于後。故假草木之靈。一至于再。以彰純孝之行。有如此。惜乎重修邑乘。語焉而不詳。故復為之記。以告後之作孝史者。

張清鎮重修獨山關侯祠記

窮古今之道義。謂之聖賢。極天下之事功。謂之豪傑。聖賢為人倫風紀。曠百世而縣之。的。豪傑趙仁赴義。務斬企合於聖賢之軌範。雖至蹈湯火。就鼎鑊。剖肝瀝膽。洞胸截脰。有所不避。孔子稱殷有三仁。又曰。知士仁人。有殺身以成仁。無求生以害仁。死而後已。聖賢豪傑胥歸一途。是以聖賢之道。昭然與日星並垂。而豪傑之士。忠義之氣。充塞兩間。其靈威赫奕。愈久而愈烈。如漢前將軍關侯。其尤著者也。侯生當炎精末造。奸雄競起。皇綱紛裂。非不知國祚將移。乃猶欲佐先主。以區區之蜀。艱難險阻。與魏吳相抗。冀挽西日。于既傾。扶九鼎于一髮。迨乎見危授命。氣節凜然。可不謂之豪傑之士。而聖賢之徒與。自侯沒迄今。千六百載。凡在通邑大都。下至荒陬僻壤。即百家之聚。數井之社。罔不隆崇廟祀。水旱疾疫。齊禱肅虔。應捷如鼓。其爵號宋世嘗稱真君。既曰公。及王。明萬曆中。尊為帝。國朝以來。崇秩游加。祀典班班可考。茲曰侯者。從其生爵。亦昔人作碑例也。荆溪縣西南七十里。有鎮曰張清。獨山踞其北。山之南麓臨溪。侯祠奠焉。自明迄今。香火繁盛。乾隆庚子。燬于火。籌畫鳩來。其地顧曠。

廟廡蕪穢弗葺。祠祀闕然。非所以昭誠敬。爰倡議合諸好義樂施者。共捐金錢為鼎新計。里人史鳳梧。余介成。力任董役。于是尅日庀工。經始于乾隆癸丑。落成于嘉慶壬戌。凡神宮殿寢。規制視舊加擴。今而後庶其可以妥神靈。而閭閻闐闐。均獲福佑矣。考張渚古鎮。一曰桃溪。宋有張氏聚族而居。乃南唐門下侍郎居永之裔。建炎中岳武穆王征戚方。屢駐師于鎮。嘗館張大年家。有題屏書。詳雲麓漫鈔。明盧忠肅公象昇故居。即在祠側。公少日每過祠。必入肅謁。慨然有慕其為人。二公公忠大節炳耀史冊。與侯後先輝映。故老相傳。侯並嘗顯著靈蹟。是鎮之有侯祠。尤足繫風俗人心之大者。且以岳盧二公。祔祠後寢。為之記。而系以銘曰。

惟天立極。惟聖作則。懿彼前型。奕世載德。侯實豐贍。懷貞履直。絕羣軼倫。丹衷悃悃。報曹封金。截顏如豕。孟起非儔。桓侯弟裨。益二成都。鼎三分趾。誓拯丕基。還于漢時。天贊其會。漢流漫滅。敵潰為魚。我得而擊。威震襄樊。功無不集。庶幾蕩平。滅此朝食。豈期垂成。豐攜鄰宇。蒙難正志。義洽千古。廟祀崇嚴。普天率土。鞠脰駭奔。寧獨川楚。鎮惟宋舊。實曰桃溪。鄂國駐師。灑望淋漓。堂堂盧公。哭誓七師。墨經沙場。荒園水湄。前列後賢。齊芳同躋。仰止高山。景行是服。神昔顯靈。佑我邦族。忠毅一心。天日共暴。桓桓摘橈。式煥式塗。春杳秋當。風馬雲車。桂醕既馨。民悅環趨。貞珉敬勒。永世弗渝。

葵源令馮君傳

君諱大山。字維嶽。五峯其號。姓馮氏。海寧人也。六世祖九皋。由赭山徙邑東園花里。考諱世瑜。世業儒。君自幼資稟穎異。狀魁奇卓犖。有成人之度。年十五。經史百家言。罔不畢究。二十四補學官弟子。旋鎮於庠。學使馬公豫講學類宮。君條答經義多發前人所未發。公心異之。相與辨難。至日昃始罷。既而延之使署。引為忘年交。君性素方正。自講經諱藝外。未嘗干以私。公益加敬禮。舉雍正己酉鄉試。庚戌成進士。發江南頭等試用。赴江蘇。未市月。奉委清查各屬積欠。及賑高郵飢。並以幹濟稱。會當題。兩江總督尹公繼善知君才。請改上江宣城令。適境大旱。潔齋致禱。竟致甘霖。歲有秋政。尚廉明。惠威兼施。胥吏不能因緣為奸。無何。以越獄累誤落職。時因公出例。予限一年。有大吏缺。望於君。不待期登之白簡。君了無愠色。曰。自我得之。我失之。又奚慊焉。遂留宣協緝。雖去官。視亦子疴瘵疾苦。惻然若切于己。上官遇有疑難。亦往往就訪。君傾意竭誠。苟可為斯民興利除害者。無所辭避。宣舊有典賣軍田。民戶於常賦外。畝輸幫貼。賸運三分。雍正七年。奉文飭禁。衛田私典者。咸令贖還。時本府以民業軍田。為日既久。且多冢墓室廬。不無紛擾。議於幫贖外。再加津貼三分。允行立碑。迨十一年。邑監生吳某。以不願津貼為辭。糾眾鼓譟。毀其碑。一邑騷然。市門盡閉。

上官聞變將窮治之。又恐激成大獄。舉張皇莫知所措。江藩李公素知君。密札致詢。君為宛曲調劑。罪止其首。脅從者概予末減。事平。全活不下數千人。留宣三歲。以暇日教授生徒。士遊其門者甚眾。若梅理梅立本。駱大俊。楊廷棟。梅子援。皆連振科第。一時人文稱極盛云。去宣日。老稚攜壺漿攀轅泣送。馬首幾為不前。乾隆己未。復任歙之婺源縣。未幾以勞卒于官。其治藝一如在宣時。邑故瘠土。境有五嶺。質成者踰越嶮阻。動需時日。兩造具備。復多守候之苦。君下車。所夕視事。斷決如流。滯牘一空。大障山有虎。屢傷人。列任不能捕。君親率從騎往遇虎。令直前搏之。瑟縮若服罪狀。竟禽以歸。自是四境無虎患。道路頌神君焉。聽獄一以理斷。屏絕私謁。汪氏為邑豪族。有朱生。貢士也。聘于時。汪慕女色。強委禽焉。母利其財。兩袒之。朱訟於官。前令皆庇汪。連年不決。君閱卷。即日追問。汪族有為君房考者。乘間為之緩頰。且啗以利。君正色曰。某承命守茲土。惟知奉法盡公。上不負吾君。即所以報吾師也。他非敢聞命。卒判於朱。歲舉童子試。拔董生文炎為案首。未及院試而卒。次名張圖南。請改冊為案首。君愀然謂董半生力學。未博一衿。今骨肉未寒。遽削其名。吾弗忍也。謝却之。院試圖南竟不錄。然感君居心之厚。益奮志勵學。甲子領鄉薦。歷宰桐廬。秀水二邑。擢杭州西海防同知。猶時遣人存問。君家不絕。其至誠感人類如此。卒之日。室無長物。

篋無整衣。士民哀思。祀之名宦祠。君性純孝。奉母馬孺人竭盡色養。在官日雖公事
鞅掌。不少違晨昏之節。所至振興文教。到婺即修紫陽夫子祠。邑儒江慎修永績學
通經著禮書綱目八十五卷。流傳未廣。君手為撰序。并繕錄一部進上。而別鈔其副
藏於家。蓋其吏治原本經術。故多卓然可觀。非僅以刀筆從事為能者也。

論曰。竊自舞勺之歲。側聞長老言。言鄉先輩以循卓著。必舉君為稱首。頃與君孫念
祖交。迺益悉君之生平。念祖手行狀。白為之傳。竊惟馮氏在漢世。門材為最盛。若左
將軍奉世。以治春秋起家。其子野王。立俱通經為良吏。所謂大馮君小馮君者。當時
播諸謳頌。君可云克紹家風矣。惜乎歷仕日淺。不獲盡其所施。為之掇擷。若圖南開
一言之善。至于終身不忘。並可著世勸云。

貞孝吳媛誄

貞孝吳媛者。荆溪人也。父岫布衣工詩。媛幼而莊淑。言笑不苟。父早喪。奉母以孝聞。
年二十二。字同邑潘淇泉。乾隆甲寅。淇泉病瘵死。媛號慟。請于母而奔喪焉。遂成服。
雞斯踴踊。坐止不離柩側。踰年。葬淇泉于計山之麓。既啟。臥身塋內。以溫之。示同
穴意也。姑何年老孀居。媛侍寢榻。像。抑搔疴癢。旦夕惟謹。雖中帶廁牕。未嘗假手婢
媵。紡績得必貲。必市甘膳。以進。凡十二年。如一日。撫夫兄之子。以為嗣。戊午除夕。鄰

人失火。延及潘外舍。時夜過半。家人皆寢息。媛情急。一手劍姑于背。一手挈嗣子避他所。復子身登樓。抱三代木主及先世遺像。跪中庭號天。願以身殉。俄而火逆風熾。鄰屋皆成煨燼。潘之中閭適當下風。甚烈而反獲全。時人嘆異。以為精誠所致。其撫嗣子教養恩備至。小弗謹。輒涕泣不食。姑恒勸慰之。嘗于枕後得小佩囊中一行云。嗣子學業無成。異日何以見吾夫地下。蓋媛之絕筆也。自是意常怏怏。嘉慶乙丑三月。患痘而卒。年三十有四。里黨疏其事實。上於大府。為之請。旌其兄諸生辰復手行狀。丐知交銘誄。友人任汝才安上傳之。纂錄。焉按昔人謂室女過門守為非常。經先儒多辨之。然而易曰。節亨。若節不可貞。若媛者可不謂之貞乎。東觀漢紀長沙義士古初。父喪未葬。鄰家失火。初冒火伏父柩。而火滅時。稱其孝。若媛者可不謂之孝乎。竊故稱之曰貞孝吳媛。以諡于立言之君子。且系之誄曰。

苦節為貞。維世執誓。死養姑。允其孝。立孤綿祚。功再造。反風滅火。彰厥報。地下魂雙相慰。勞判瀕溥。游計峰峭。勒銘千秋彤史告。

國朝文匯乙集目錄

卷四十一

劉台拱字瑞臨江蘇寶應人乾隆辛卯舉人

顧龍山興造記代

見山堂記代

胡氏女貞節記

竹鄰張君家傳

史母陳太宜人墓誌銘

馮偉字偉人號仲康江蘇太倉人乾隆辛卯舉人有仲康文集

原天人之故一

原天人之故二

原天人之故三

宋太祖論

毛文簡公遺稿題後

王烈女述

七 七 六 六 五 五 三 二 一 一 一

楊復吉字列歐江蘇震澤人乾隆壬辰進士有解月樓學古文

李訓鄭注論 十

孔郡主記 十

錢馥字廣伯號懷亭又號綠窗浙江海甯州人布衣著有綠窗遺集

書佩刀歌後 十二

祝人齋先生小傳 十二

吳俊字墨端號蘇齋江蘇吳縣人乾隆壬辰進士官山東布政使

李氏新修祠堂後園記 十四

李翮字春麓山東金鄉人乾隆壬辰進士官浙江嘉湖道有文集

左都督趙公墓表 十五

秦瀛字凌谷號小峴江蘇無錫人乾隆甲午舉人官刑部侍郎有小峴山人集

復社姓氏錄序 十六

海潮輯說序 十六

周松霽詩序 十七

揖峯亭圖記 十七

洞霄宮三賢祠碑

十八

安先生家傳

十九

書支貞女事

十九

呂星垣

字叔詒江蘇武進人康熙生官
贊皇縣知縣有白雲草堂集

教習子論

二十一

棋噲論

二十一

雜草說

二十二

承德堂四子序

二十三

遊天平山記

二十三

龍井遊記

二十四

道場山燕遊記

二十五

寶相寺記

二十六

襄城子產祠碑記

二十七

湯陰嵇侍中祠碑記

二十八

閔貞傳

二十九

王烈婦傳

二十九

國學扶輪社印

國朝文匯乙集卷四十一

顧龍山興造記

代

劉台拱

距金壇城南五里許。有山曰顧龍。蓋茅山之脈。蜿蜒東來。結為岡巒。北瞰城中。有朝拱抱衛之勢。故父老以為縣之盛衰。常視乎此。非獨形家言。亦地勢實然也。山舊有延陵季子漢壽亭侯呂真人等祠廟。季子祠之左有碑亭。昔明太祖常登此山。作樂府辭。正德間勒碑建亭於此。歲久亭廢。祠廟亦傾圮。百年老屋。上漏旁穿。與風雨因依淒然可感。余議捐俸修復。謀之邑人。咸以為宜揆時面勢。衆役並作。祠廟碑亭。因其故址。或葺或營。規度隙地。創建新堂。以為遊燕憩息之所。故時祠宇東西棋置。渙散不屬。為繚以長垣。通以曲徑。雜蒔華竹。映帶左右。逶迤複沓。延賞不窮。翼室修廊。僧衆所棲。井增其舊。材甃必良。構築必堅。甯樓毋華。甯費毋吝。經始於乾隆五十四年五月。至九月落成。金壇雖小邑。然自宋南渡以來。衣冠特盛。碩學名臣。彙聚相望。文章著述。被於天下。地多陂澤。有灌溉之利。土壤沃腴。衣食澹足。其本俗然也。夫盛衰之運。無往不復。而或者徂目前之見。至以僻陋為譏。豈通論哉。況今故家名族。流風猶存。農工商賈。不失其業。使胥敷絃誦。而絕嬉遊。樂勤生而恥惰窳。數年之後。光顯富貴。駸駸以復於曩時之盛。則雖通都大邑。或猶有愧焉。地形人事。理實相因。此

山之興復諒亦不為無助。因記其營造之歲月。而并著其說以示邑人。使知所勸也。

見山堂記代

鎮江府署居山上。因山為城。因城為垣。門阿屋翼。與雉堞爭高下。郭廛之內。煙火萬家。可俯而闕也。署之西偏。地尤高曠。而蹊隧荒蕪。屋宇敝陋。不足以展眺望。適開榛莽。修濯柳為堂於舊亭之南。東西七筵。南北五筵。不下几席。而東南諸山。蹲者伏者。竦而立者。絡繹而奔馳者。皆可以坐而致之。名之曰見山。著其實也。余以辛卯正月。始莅茲土。簿領紛紜。目不暇給。比視事年餘。而後摒擋略盡。俗好訐訟。稍以條教禁止。而傲其不率。民亦駸駸嚮化。政簡刑清。郡中無事。乃得休其餘閒。而與賓客僚吏。優游觴詠。於是閒嘗舉酒而屬客曰。客亦知夫見山之說乎。攀危躡險。窮高極深。襍被羸糧。而後進。兼旬累月。而後反。雖獲一時之樂。而事過境遷。邈然無覩。彼其於山也。不亦求之者勞。而得之者少乎。若夫坐乎堂皇。而視數十里之外。晴雲杳靄。陰雨空濛。晦明朝暮。千態萬狀。無意於見。而無不見者。乃真見也。夫無意者。常逸。有意者。常勞。勞者不足。而逸者有餘。豈獨觀山而已哉。客曰。然。遂書之以為記。

胡氏女貞節記

教諭楊君。自金壇以書抵余。言胡氏女事。曰。胡氏湖北孝感人。金壇縣知縣名志熊。

女也。許嫁漢陽選拔貢生蕭君之子。國子監生員。蕭君充四庫寫書官。卒於京師。貧扶輿南歸。道病亦卒。女聞之。請於父母。將守志於蕭氏。父母不能奪。遂歸焉。時乾隆四十六年某月也。自孝感越漢陽。渡江中流。風作。舟覆溺者不可勝計。獨女所乘舟安然無恙。若有神物護持云。台拱曰。嗚呼。此可以知天道矣。自古忠孝節義動天地。感鬼神。載在簡冊。昭然可見。豈虛也哉。余生平所聞。見有高郵孫氏。南昌彭氏二女。皆卓卓可稱。道感楊君之言。并述其事著於篇。孫氏者。己卯江南省解元同叔之女。少許聘寶應王氏女。外家也。母卒。王氏之黨住臨其喪。舟覆溺死數人。壻與焉。是時女新喪母。哭泣悲哀。人皆以為為母。故莫能測其意。女有妹亦許聘寶應。服闋將嫁之。父自失內助。家事無大小悉倚女。乃挈之行。事已治裝將歸。女曰。外祖父母愛憐我。比其喪未嘗一哭。請拜而後行。父以為然。許之。既至曰。我以家福累夫子。我尚何歸。遂留王氏女。今年四十餘。彭氏者。今兵部尚書南昌公第四女也。許故禮部尚書新建曹公為子婦。曹氏子殤。女尚幼。已確然有志操。非歲時家慶不御朱紫。家人未之覺也。稍長為議婚。女乃言曰。母也何不諒人。豈不見女數年中服飾乎。父母慰諭之終不可。乾隆四十九年七月。曹公薨於位。既殯。壻而往。稽顙哭踊。還拜其姑於喪次。姑以喪子失明。執婦手相持哭。是時女年十七。內外觀者近千人。無不歎息泣下。

天子聞之曰。可憐。可憐。每尚書進。輒問貞女。天語褒嘉不置。云。台拱實應人。而南昌公門下士也。是以書二女之事。尤得其詳焉。

竹邨張君家傳

君諱若筠。字竹邨。姓張氏。丹徒人。好學。於書無所不窺。聞有異書。輒重價購之。或手自逆。勝校勘。矻矻不少休。同縣蔣舍人宗海。藏書三萬餘卷。多善本。君所藏踰二萬卷。而法書名畫。吉金貞石之文。別為卷軸。不在此限。京口士大夫收藏之富。推此兩家。君性簡重。寡言笑。不妄交人。晚年益屏人事。掃一室。日坐卧其中。子弟僮僕。非呼召不至前。沈潛玩索。神凝氣寂。遇之者以為無人也。與兄坤弟堂相友愛。家有園亭。竹木之勝。兄弟并能詩。善飲。精鑒賞。暇日具壺觴。召朋舊。流連倡和。互出所藏。元明人書畫。品題甲乙。以為樂。坤子奎。堂子鉉。及君之子銓。亦能詩。奎兼工畫。揚州某氏藏書為江淮間第一。其子孫不能守。君聞即冒風雪渡江。購得宋槧書數部。以歸。奎為作風雪載書圖。一時名士。皆為之題詠。京口多佳山水。君興至。即出遊。愛八公洞。林壑幽邃。讀書深雲精舍者數年。大江南北名勝之區。屢齒殆遍。而杭之西湖。凡七至。其好遊如此。君少以諸生高第。食廩餼。有聲場屋間。屢試不遇。循例貢太學。遂不就試。其居鄉睦嫻。任恤樂振人之乏絕。嘗以田百畝為書院。諸生膏火資。邑有留養

局以養鰥寡孤獨貧病之人。君以田四百畝佐其費。鄉人德之。嘉慶三年卒。年六十四。有竹鄰山館詩集若干卷。又選京口耆舊詩為蒙拾集四卷。

贊曰。吾觀馬文淵立功海外。貴顯封侯。而淫潦毒霧之中。追念少游平生時語。未始不為之太息也。及讀仲長統樂志論。以為彼既不應州郡辟命。志之所樂。何求不獲。顧亦為是想像願望之詞。而未嘗一日逍遙睥睨於其間。乃知物外之樂。雖山林隱逸。有不能以盡得之。而況於功名之士哉。若張君者。萃人世清遠閒曠之福。而享之數十年。可謂難矣。以視公理所論。殆猶過之。世之馳逐風塵。役役而無所稅駕者。聞張君之風。獨何能無慨於中乎。

史母陳太宜人墓誌銘

知雲州史君紹登之母陳太宜人。以嘉慶四年十一月辛未卒於寶應。明年訃至會雲南。有兵事。未得歸。其弟太學生續登營宅兆於城北之松園莊。而弗致葬。記曰。在竟內。則俟之禮也已。而紹登被詔起復。迺卜以八年閏二月丁卯。襄葬。事記曰。在竟外。則不俟禮也。於是續登以告其友劉台拱。使助執紼。且請銘。台拱辭不得命。迺敘而銘之。敘曰。太宜人姓陳氏。寶應人。故分守河南道史公諱奕瓊之少室也。史氏深陽大族。河東公為故文淵閣大學士文靖公季子。而娶於寶應劉氏。因稍置田宅。

定居焉。乾隆三十六年，河東公卒於官，歸葬於寶應城北之龍首村，而以劉恭人祔。是時紹登年十七，續登年十三。太宜人拊養訓誨，皆成立。後河東公二十有八年卒。享年六十有二，子男二人，孫男十四人，孫女五人。曾孫男女三人。太宜人性簡重，有德量。處諸娣間，逡巡退讓，未嘗計有無，校曲直。以是同居無纖芥。而河東公尤亟稱其賢。諸娣有孟孺人蚤卒，遺女七歲，太宜人字之如其女。女之暱太宜人，亦與有母同。紹登官雲南，道遠書問不時至。太宜人思之甚，然不欲以內顧撓其心。每寄語曰：汝家受國恩最厚，當竭力圖報稱，毋以家為念。紹登為吏廉平，所居見紀。蓋母教也。先是紹登知文山縣，黔苗猖獗，時時闖入滇界。紹登患之，簡丁壯得三百餘人，教之坐作擊刺，皆為精兵。聞賊在百餘里外，即馳赴之，以少擊眾，屢戰皆捷。由大創，又解救黃草壩之圍，全活數萬人。自是雲南無苗患。僂氏蠻誘扇諸種人為寇，距文山十五里而軍，城中恒懼。又與守將犄角，俘其渠帥。餘黨悉平。以最遷雲州。會討維西叛蠻，被擢守關隘，撫流亡。役未竣而聞太宜人喪，當去職。大府以其功狀聞，且乞留滇。詔許之。昔者漢踵秦故，置材官騎士於郡國。太守都尉常以歲八月都試講武，課殿最，守尉權重而郡國兵精。即有盜賊，得以應時捕討，無崩潰四出之憂。及光武併尉職，罷都試，材官騎士還復民伍，其制遂壞。於是始發京師之兵，以赴郡國之急。

一方有警。則羽檄被於三邊。弓弩甲楯。取具臨時。士不素練。每戰輒北。得失之效。前人論之詳矣。觀夫文山之事。則郡縣之兵。庸可忽乎。使天下長吏。皆有文山之廉平。則盜賊必不作。有文山之勇略。則雖有盜賊。亦不難於剪除。語曰。縣縣不絕。將成網羅。青青不伐。將尋斧柯。余故因銘太宜人之葬。而備論其事。以附於魯公伯禽之義。以白紹登之志云。銘曰。

猗嗟碩媛。明昭義方。滋彼蘭茝。蔚為國香。金馬碧雞。萬里蠻疆。兒曰歸乎。有母在堂。母曰勗哉。及爾方將。竭爾股肱。嗣爾忠良。爾無我思。爾弟在傍。筆牘受言。其音琅琅。象服斯望。榮哀故鄉。安於首邱。百世無傷。

原天人之故一

馮偉

衆人之所以奸欺貪暴賊殺淫盜而不知怵畏不知悛改者由見己而不見人不見天也。界之以豐豫寬美謂是吾智力之角勝也。界之以憂愁苦惱謂是吾智力之有遺也。而天又若未嘗顯示人以旦夕之誅殛。於是中材亦瞽然於冥冥之中。無所慕而不為善。無所畏而為惡矣。飲食牝牡之欲昏昏然。無廉恥而忍譏詢。其欺君父也。忍於欺妻子也。其盜君父也。不啻盜冤家也。而不知君父即天也。君父有雷霆之誅。雨露之恩。而曾不畏懼。曾不感戴。謂是吾智力之所勝也。謂是吾智力之有遺也。如是而天牖下民之權亦窮。天牖下民之權既窮。則衆人之奸暴淫賊偷生反側者。日熾盛而不可遏。於是天乃以大罰殛之。或一家。或一鄉。凶荒疢癘。所以蕩滌邪穢。開導吉祥。舍其舊而圖其新。天之不得已也。天之所不得已者。非天故更之。人實召之也。人可得而召之。則人亦可得而讓之。讓之者。中人之所可勉而為者也。讓之若何。畏天而已矣。子之於父母也。雖遭三撻。苟竭其呼籲之誠。則父母實之矣。人之於天也。雖當降割。苟竭其改悔之誠。則天實之矣。悔改之若何。曰舉一念而曰不可使天知之也。則勿存之。為一事而曰非天之所喜也。則勿為之。夫其可使天知之與不可使天知之。天之所喜與非天之所喜。揆之於人心。愚智皆有纖纖之明焉。夫如

是何疑於天人一理也哉。程子曰：天人本無二，不必言合。此可謂至矣。

原天人之故二

夫舉一念而可使天知之，與不可使天知之，為一事而為天之所喜，與非天之所喜，愚者或未能決斷於神明之內，則莫若仍以人合天。為人臣者，舉一念，行一事，而不可使君知之，或非君之所喜也，則必其不合於天者矣。為人子者，舉一念，行一事，而不可使父知之，與非父之所喜也，則必不合於天者矣。吾與甲交，而吾之舉念，不可使甲知也；甲與乙相害，而吾之為甲謀者，不可使乙知也，則必其不合於天者矣。默啟乎天心者，不求赫赫之功名，為一善而人共稱之，則天或置之矣；為一善而人不知之，則天必錄之矣。行善而不誠，未可為善也；積誠而不久，未可為誠也。吾未見為善而不報於天者也。吾未見為善而責報於天者也。始於畏天，是有為為之也；終於樂天，是無為為之也。無為為之者，與天合德者也。是故文王之配天，比干宏演之剖心肝，皆樂天也。皆無為為之也。假使為善者而必不剖心，必獲尊顯，則下愚之奸欺克暴，皆勉而為君子焉。如是而比干宏演之節不顯，是故殀壽不貳，修身以俟者，君子之所勉，而非中人以下所及也。雖然，不極其事於樂天，則事天之道，猶中道而止耳。吾未浚

其源。而何以責小人之不知天矣哉。

原天人之故三

鼻之所吸。即天氣也。目之所視。即天光也。置身於天之中。而任天氣之升降飛揚。我無措意焉。猶魚置身於水之中。而任水性之浮沉潛見。魚何容心焉。是之謂樂天。雖然。魚之滋養於水也。有生無殺。人之滋養於氣也。有生有殺。其故何哉。天以清明和粹之氣。煦嫗萬物。清明和粹之氣。不勝。則昏濁雜駁之氣。轉勝。而萬物受其天閼矣。或為賊盜。或為毒竊。或為疫癘。或為水旱。或為饑饉。或為盜賊。皆清明和粹之氣。之不勝為之也。是故畏天者。不徒順天氣而已。尤必承天命焉。能承天命者。始可與言立命矣。立命者。與天合德者也。氣之有醇有雜。命之有賞有罰也。鬼神或預知其朕兆。而微以告人。天或露其緘於鬼神。而明以告人。天之仁愛保護者。豈不有加而無已哉。天之威福予奪者。豈嘗一成而不變哉。堯問於舜曰。人情何如。舜對曰。人情甚不美。妻子具而孝衰於親。嗜欲得而信衰於友。爵祿盛而忠衰於君。人之情乎。凡大無道之事。悉由於此。君父之所無如何也。天之所無如何也。則天亦何責有此。怙淫悖亂之子孫。而泰養之於檻圈中哉。

宋太祖論

宋太祖將下江南。唐遣徐鉉求緩師。請於宋祖曰。李煜無罪。陛下兵出無名。煜以小
事大如子事父。未有過失。奈何伐之。宋祖曰。爾謂父子為兩家可乎。鉉不能對。踰月
復遣鉉至。論辯不已。宋祖曰。不須多言。江南亦有何罪。但卧榻之側。豈容他人鼾睡
耶。鉉遂辭塞。論者美宋祖捷於折辯。予謂宋祖於是失言矣。夫王者之言。大公以為
理。順理以為恕。書之史策。傳之子孫。異國期於可法可行而已矣。宋祖之言。是小人
嬉戲諧謔之論。非君子之所宜出也。且夫古之王者。非有絕人之勇。過人之材也。而
臣服億兆。尺一所至。奔走讐服。無他義而已矣。名而已矣。逮尊卑之分替。而利害之
實勝。於是士競錐刀。吏析秋毫。我得而奪。彼下得而取上。蜂蟻成聚。威號不行。而駕
馭之術窮矣。古之王者。有以知天下大勢之所趨。因乎上之所尚。故常重乎名。而利
與實實而不言。吾以為此實莫大也。利莫聚也。夫子曰。必也正名乎。名不正則言不
順。言不順則事不成。又曰。惟名不可以假人。春秋之世。其去周盛時遠矣。然諸侯猶
重名。如齊孝公伐魯。以先王之命還師。秦獲晉侯。穆公以晉大夫天地之要。卒歸晉
侯。鄭以小國居強大之間。壞垣獻捷。徒以先王之制折服強侯。孔子美之曰。非文辭
不為功。其後晉楚諸國。求貨求馬者。踵起。諸侯攜貳。吳越強盛。務詐力奮軔。而前王
之令鬼神之誓。視若游戲。然范蠡謂吳人曰。吾雖覩然人面哉。吾猶禽獸也。又安知

是譏議者乎。斯宋祖之秘術也。唐太宗伐王世充。謂曰。四海盡仰王風。惟公獨阻聲教。為此而來論者。謂太宗此言。語雖大而理不暢。然視宋祖猶直矣。宋祖利江南土地。本無可以為名。直以謾語搪突。夫王者大封同異姓。臣猶子也。何必一家既曰無罪。而卧榻鼯睡。可以為名乎。以不公。故不順。可以為義乎。迨其季世。見遼事日蹙。遂助金滅遼。見金源日蹙。遂助元滅金。其顧利而不顧舊約。皆太祖之言有以啟之也。雖宋亦何利矣哉。

毛文簡公遺稿題後

毛文簡公遺稿二卷。萬曆中公之從曾孫侍御在按中州時所刻。蓋什百中之一二耳。予得之侍御曾孫惠公。惠公今為農家子也。羅文莊公大泌山人為之序。大泌山人之言曰。明興。鴻昌龐茂之運。無如敬皇帝朝。一切新進喜事。悉不用。薦紳大夫重去國。國多白首魁壘之臣。人有君子長者之行。而文章醇厚爾雅。稱盛時風。公丁其時。所漸染為多。其持論根極道理。通政術。而匹夫匹婦可以喻。其氣舒徐不迫。充然而若未竟。其意澹然若無深思。而醞藉有餘味。其於人不為虛美。而嚶綏有情。按其編而知其為敬皇帝時人也。今去公垂八十年。作者如林。大都刻剝以見法。馳騁以見學。卓覲以見才。藻鑿以見情。至封事彈奏。果於撻擊者。聚訟罵坐。議者竊病其為

世道之流弊矣。於乎。以若所長。公豈其欲之而不能哉。所不為也。偉讀而歎曰。懿哉。大泌山人之言乎。吾嘗謂明之衰亂。不兆於神宗。而兆於世宗。今觀此序。可以見一代文章之升降焉。可以見一代士風之醇醪焉。可以見一代臣節之忠邪焉。可以見一代國祚之興替焉。可不謂知言乎。悲夫。清廟閟宮。非岸獄之徑。稽經誼禮。非廢死之媒。師丹司馬光。非龍比之亞。大禮之議起。至於杖滴死者數十百人。士類襁負。同朝一空。不祥莫甚於此。仁鳥覆巢。鷹鷂縱啄。君臣之變。從古未有。聞焉。然何孟春等唱合數百人。伏闕固諍。以眾取勝。以氣脅從。大誦祖宗。撼門慟哭。幾於訕矣。何以諫為。羣臣欲存敬皇帝父子之緒。而遂忘君臣之體。安在其為愛國乎。然後歎公之東經陳善。百折不回。卻覓珠於清夜。辭太宰如脫屣。不可則止。進退雍然。身既歿而易名于祭。元首股肱之分。始終全焉。雖公之幸。未及於熾盛。與抑守死持義而不矜節。不啻名者。天下有幾人哉。此可為後世事君者鵠也。予既味公文。而深感於大泌山人之言。後之論古者。所當知也。乃錄其語而還之惠公。惠公其尚訓子孫。以繼戎祖考。奮起於田間也哉。

王烈女述

王烈女者。太倉璜澀里東鄉人。馮生策勳之聘室也。名貞。字慕貞。自其欲從夫氏之

喪而不得也曰先祖錫名曰珍。吾改稱貞以寓志也。蓋女年十三許生。二載而楚越十四載卒。殉身焉。其父天香母周氏顧氏。烈女四歲而孤。與伯父諸生香同居。幼學於舅氏。通訓詁。沈覽諸史。皆曉析。與生年亞。舊有連生字。又琦國學生。大樹季子。幼穎出。能應試矣。訃至。烈女三日卧不食。泣血斑斑。母強之糜。乃稍稍起。欲歸。馮母不許。將婚他族。烈女輒宛轉號呼。欲速盡。聘者沈姬。黠以金珠。烈女擲諸地。且泣遂止。屢屢然矣。久之。聞生且葬。堅欲往。兄曰。爾去奚為。曰。吾但一見郎。隱尸其旁。彼宗人喈曰。此吾馮氏人也。憫其誠。得葬螺蟻足矣。兄曰。若然。且俟吾死。遂止。乃謂其同輩戚曰。郎隱既不獲殉。獨無郎像乎。戚為密購。烈女謹襲之。流涕益哀。母瞞得之。故終母身未改字也。既母疾甚。族人謂曰。脫有不諱。奈何。烈女曰。兒志決於命名矣。在昔閨行。或傳孝義。或著節烈。竊慕前徽。稱未亡人矣。敢有他圖。或微諷改節。則曰生為馮氏人。死為馮氏鬼。其誓如此。無何母歿。烈女曰。而今可以歸馮矣。族人以馮無同產難之。烈女曰。即無同產。猶有功親。獨不許我守義乎。楊甲者。馮舊蒼頭奴也。往來為傭。烈女圖言於馮。以誠告曰。自吾遭殞所天。未獲執喪成禮。比觀傳冊。曉暢大義。恒焉痛疾。則既無及。而母持之牢。若決絕歸馮。危懼不測。故隱忍連今十三年矣。今當得馮一屢。織紵為生。足畢此生。馮不許我。我則效死於馮。不再歸矣。楊持其說。

問里媼有處子嫁死夫者乎。皆笑曰。無之。乃不訴馮也。烈女曰。吾比益戰慄。若隕若驚。第忍三歲庶獲戢甯。世豈有求我於晚晚者乎。而是時香老病。為香後者。女之兄也。前死。獨恃烈女在。亦幸其有家耳。會里有問名者。香漫應之。烈女訶知之。諗戚曰。死於聘前者。完然王氏女也。死於後。即非完人矣。遂賦詩五章。人定後。扃戶縊。家人覺之。排闥持火入。烈女奮撲撲火。火滅。家人益駭愕。遍號鄰婦。復持火入。結牢甚。解之。則既絕。救之夜半轉甦。顧然曰。曷為而復活我也。時乾隆戊申臘月八日也。烈女既甦。風聞播聲。猶熾。則兩移書於媒。卻之。媒其外兄也。畧謂貞不幸遭罹大故。三年之內。寢苦枕函之罪人也。且也。父東母西。前當指墳壠未卜封樹無期。次第經營。當歷數年。今何時。而可以議婚姻乎。某子年方少。宜擇對相當者。不可坐失盛年。幸寢其事。則肉骨之恩也。蓋烈女貞剛。內蓄不為怒目嚼齒圖以通喪。緩婚。潛一肩輿詣馮。則求者不卻。自息。而市僧情於禮。且遂納幣。故烈女卒自戕也。鄰媼賀曰。姊明年為里中人矣。烈女曰。不然。終作鄉間鬼耳。於時楊至。則哭讓之曰。吾召汝不來。今朝暮人耳。不可歸馮矣。始烈女與楊約。欲徑詣馮。會事急。屢手札趣楊。為中掣。不至。授楊詩一帙曰。示威懿通文者。悉散遣其廝養。假疾卧不食。強之。則曰。噬痛不能食。自頻納絞。創痕深陷。或謂喉裂不治。正月九日黃昏。氣蒸蒸。益紅潤。遂絕。前日氣微屬。聞

媒至猶曰今日須還某家幣媒領之而已其護前如此卧八日而死距母喪四月云於是里人驚傳其事痛女自成名節而操之已感也其夫之從兄係在虞山感噩夢歸往奠祭題曰從弟又琦聘室遂迎其主歸與生之主謁祖布筵受奠焉君子曰亡於禮者之禮也猶義也夫烈女性婉嫵容不脍耳不飾終日討究古今兼通素問事母兄孝友母疾女舂木榻其左以肉飼蠶不設帷不解帶以至絕每哭輒絕頭撞棺流血齧面或勸之曰何至是則曰欲死耳工詩及楷法假物據情均寓共姜之志偶書婢扇長者曰勿書扇恐墮男子手遂終身不書烈女歿馮之女吳夢一女子整容而入曰吾今至矣吾假爾寄聲不可無識則剪髮一卷去詰旦吳梳果墮髮一卷其殺爽胡可歿也

馮偉曰古之傳烈女或敦詩說禮循劬窈德象女師之則或勞面剔目效柏舟之死靡他之仁皆以聲著汗青微昭正氣而烈女兼有之處茅蘿竹屋中恂恂類儒士毀形斂迹而有凌薄風雲之氣斯節貫神明者哉且夫引決自裁者一死而已烈女伺間輒死死而不殊不殊又死古稱忼慨從容又兼有之其可畏也夫故博訪鄉評詳誦咸邇反覆審覈不蔽善不溢美或微或顯以正立言君子云

李訓鄭注論

楊復吉

人臣委贄於君。惟君所使。苟當盜賊橫行。銜命出討。而能滌氛獻馘。固足稱功。不幸而時危勢變。絕脰捐軀。要無愧匪躬之義。千古後之良史。亦必大書特書。推為遇難全節之臣。以為天下後世勸。此公論也。唐自天寶以後。藩寇交訌。乘輿播越。君如弈棋。歷百餘年。然安史朱李。犯關而不能弑君。而死於宦寺者。不一變生肘腋。猝不及防。雖貴戚大臣。亦無從聲罪致討。是奇山大惡。莫唐之宦寺若也。苟有仗節之臣於此。先發後聞。肅清宮掖。如竇武何。進之前事。君子亦將進而嘉許之。而况奉君命以申討。事泄而反為所乘。以致殺身傾家。可不謂之忠乎。可不謂之義乎。乃李訓鄭注溫公通鑑。毅然筆伐。下及王涯賈餗輩。未與謀而連坐者。且著論以申其罪。而快心於其死後之論史者。遂羣焉附和。無敢異議。嗟乎。嗟乎。內盜外盜。其盜一也。况剗刃於故君。盤踞於禁闥。其奇山大惡。比斬木揭竿者。有加等。亂臣賊子。人人得而誅之。而况名正言順。如訓注斯舉者。即謂謀之不臧。以致九重震驚。丹陛伏尸。則謀事在人。成事在天下。千古不絕其人。訓注不獨任受過也。如溫公之論。則高重捷可以伏朱泚之刑。程宗楚可以受黃巢之戮乎哉。君臣之義。征討之例。冠履之辨。作史者素之論古者。昧之不幾長盜賊凶頑之箴乎乎。蓋嘗讀史至此。輒欲泚筆大書。帝與

李訓鄭注舒元興謀誅官者仇士良等不克訓注元興及王涯賈餗死之以伸公憤而終反覆不解於溫公之書法及宋明人之作論者也且獨不見文宗之語周墀受制家奴歎恨千古蓋較之輿觀街壁青衣行酒之辱於強敵者其慘毒有百倍焉然則主憂臣辱主辱臣死如訓注者真可謂能得死所者哉

孔郡王記

郡主名嗣貞定南壯武王有德女也順治七年冬王定兩粵命鎮桂林九年夏偽將李定國驅象攻城城破王率妻子自焚郡主年十二單騎絕城走匿民間明年將軍線國安復定粵郡主謁軍門請歸京師自願於兵部朝廷問其閨門死事詔封郡主既長適孫延齡王舊所許字者也康熙三年以延齡功臣壻命為將軍出鎮衡州六年夏移鎮桂林乃大治宮室自衡州入居之郡主別居定南王舊府而延齡列宅左偏旦日率藩下將領詣府參謁畢乃入內寢夫婦譙笑以為常大農所給藩餉若干萬廨養皆鮮衣怒馬炫耀民間時裂土分王異姓諸王雲南吳三桂廣東尚可喜福建耿繼茂而郡主則朝廷念定南舊勲恩禮與之埒延齡既得志意忽忽若失或頭目眩暈不視軍事學圍棋鼓琴臨池搨摹古帖挾彈丸張簫取魚鳥以為樂凡數年其戲下都統王永年既心易延齡年少無大材畧不屑為之下而延齡亦驕恣

數傲侮永年。遂有隙。十二年二月。永年冠減軍餉。為兵校所訟。巡撫馬雄鎮治之。延齡因言永年不法事。令郡主赴京面奏。而永年亦遣人間道入京。阻郡主於河南。不得進。仍返粵。延齡益憾。十三年春。吳三桂反於滇。延齡遣人納款。而誘永年以下。十二人至府。盡殺之。蓄髮易冠。發兵反。逼巡撫以下易冠服。綴符篆。囚馬雄鎮。殺牧令劉浩。劉欽。鄒周岱生等。以應三桂。時提督馬雄駐柳州。亦叛降三桂。然素與延齡隙。日治兵相攻。延齡數為所敗。勢遂蹙。既而延齡上疏三桂。稱名不臣。不用其印。劄自鑄印。設官變置州縣。視賄多者與善。地兵餉不以時給。軍士不服。十五年。遂鼓譟逐延齡。夫婦出府。立綠國安子存仁。既存仁約束軍士。頗嚴。軍士復鼓譟逐存仁。而迎延齡。時延齡方匿城中。見眾勢洶洶。疑其逐之不逞。且加誅懼。不敢出。郡主曰。出亦死。不出亦死。乃藏延齡別室。而自出見軍士曰。而曹殺我夫婦易耳。獨不念先定南乎。軍士環列叩首。具陳所以奉迎意。郡主察其無他。呼延齡出。延齡不敢坐。輿請以一輿昇其妻。而身挽輿以行。既入府。延齡慙不視事。謂郡主曰。吾之得復也。以卿故。軍士念定南王威德。以貴重卿。卿其握權視事。吾願為閒人矣。郡主遂戎服繡帕首。蟒衣。日擊鼓升堂理軍務。軍士頗服。延齡仍倚妻勢。執帷幄權。因綠成仁於獄。吳三桂聞之。令繫以流瓊州。至柳州。馬雄留之。遂說雄致書三桂。稱延齡陽奉命。非真意。

三桂方患其不稱臣信之十月遣其兄子偽將軍吳世琮至桂林給延齡若和好兩家者延齡不知雄之間已郊迎世琮相見出伏卒斷其首於馬上圍送雄所延齡之出迎世琮也上馬馬不肯行郡主固以為危及是為三桂遣送滇中子蔭培與俱十八年己未王師平吳逆朝議以孔有德舊功女實勿罪仍命居桂奉定南王孫嘗以終

論曰延齡駟僧下材耳以婦故得膺顯爵不思報效當滇閩叛逆時輒翻城負國以贊非義之富貴其敗亡固不待再計而決獨惜嗣貞以一孱女子能跳身千萬軍中乃不克堅守大郎而隱忍偷生從夫為亂雖邀鴻恩待以不死而面目覷然其心死已久矣詩曰哲婦傾城傳曰女德無極此之謂與

書佩刀歌後

錢 頤

昔吾高伯祖君益府君諱大受。多力尚義精大刀。時以為號明末盜賊譟起遠近騷然。吾族素豐。財獨得無事。則以府君之刀為盜賊所畏。故日者有巨盜劫管翁參字家。翁故府君母舅。府君雖然曰。周親也不救。非義。遂提刀赴之。遇戰趙官橋。手刃渠魁數人。羣盜方披靡驚竄。聞刀忽折。倖被盜傷。創甚。腸出。猶持刀柄奮擊。死卓立不仆。握刀柄如生時。事詳州志義行傳。刀傳於家。大父尚及見之。今不知所歸矣。茲友人李君汝龍示余佩刀歌。奉誦凜然。覺李翁節義與高伯祖大略相似。顧李翁能卒保其身。高伯祖竟死于寇。蓋有幸不幸焉。而李翁遺器流傳。復得賢子孫表章之。高伯祖之刀沈埋泯滅。曾莫過而問焉者。讀是歌不益慨吾宗之衰歟。

祝人齋先生小傳

先生名淦。初名游龍。字貽孫。姓祝氏。世為海甯名族。生周晬而孤。年四歲。母課之識字。首舉人字詔之。曰。人須是頂天立地。先生不敢忘。因號人齋。以自志焉。少長勵志勤學。六經四子而外。深嗜理學諸書。讀楊園先生集。謂其昌言自教。與朱子先後一揆。足以正後儒偏詖之趨。而續古聖微茫之緒。用是蒐輯遺書。手為訂定。既復東朱子近思錄義例。采輯精要。以為一編。名曰淑父志。私願焉。先生之於楊園也。可謂盡

心焉耳矣。甯化雷公翠庭視學兩浙。極力表章楊園。皆先生導揚之也。楊園嘗謂三代而下。羣言淆亂。折衷于朱子而可矣。先生篤信斯言。故生平于朱子之學。講習最深。為能有以識其始終條理之必然而不可易者。而見夫續近思錄者。繁簡失當。朱子之道。或從而晦。爰彙其全書。撮取精當切要之言。亦遵近思錄例。以下學名其編。由是而纂編節要。皆所謂擇焉而不精者矣。先生之學。由楊園以遡洛間。粹然一出于正。若靜悟良知之說。則深惡而痛疾之。然不好為爭辨。以涉門戶之私。惟日孜孜于倫常日用。戚族鄉黨之間。以盡其分。先生自祖至身。世皆單傳。事再從諸父昆弟。無不曲盡恩義。凡族姓婚喪葬祭事。有絀于力而不克自舉者。必竭力資之。至稱貸未嘗告瘁。子姪可教者。飲食教誨如恐不及。即不可化。亦必多方開導。終無棄絕之意。而其天性仁厚。遇人率如是不獨于一本為然也。交朋友生死不渝。大理郡守汪公謝谷深契先生之官。不攜親屬。廷先生共往。先生無一不左右之。無何汪公病卒。先生經紀其喪。扶輓旋里。山川悠遠。跋涉維勞。既至。為文辭其靈。猶不勝傷感者。孝廉周君鐵梅友取端人。存日縞紵結契。不僅一先生。而身後罕有。邇其子嗣者。獨先生教養其季子庸玉。攜俱游處。俾得成立。是誠可起死者而生者不愧也。先生平生義舉類此不一。此則章章共覩者耳。先生用力于敬。須臾不離。家居對妻妾與游處。

王公大人間無異容。嘗授經淳藩。及衍聖公第。莫不以嚴見憚。或勸少貶。先生曰。師道固如是也。當時若陳相國蓮。字雷副憲。翠庭傳少尹。謹齋陳布衣。頌恭皆忘年略分。與先生為道義交。觀摩講習。終身無間。新城陳進士凝齋。嘗囑先生刪潤禮記注疏。凡三易。彙而弗及。成人咸惜之。詩文尺牘。散逸之餘。僅存數十首。藏于家。先生生於康熙壬午。卒于乾隆己卯。年五十有八。中丙辰舉人。子一名禾。先生卒時。才五歲。再殤。

鄉後學錢馥曰。天地人稱三才。是人與天地固並立而為三也。自人不克盡其道。斯不免跼天踏地耳。先生任道力行。卓然自立。如是可謂俯仰無愧矣。然非母氏之教。不及此。許大辛曰。古今人自聖賢以下。苟有成立得之母教者。恒多。觀于先生。益信。

李氏新修祠堂後圖記

吳俊

乾隆五十二年丁未。余奉命視學滇南。余弟少甫侍奉先太夫人在京。太夫人嬰疾棄養。少甫扶柩南歸。余在滇聞訃。匍匐奔喪回籍。而田無一壥。屋無一椽。到蘇日。幾于露處。賴有祠堂一區在盤門內瑞光寺西。乃余壬辰成進士後棄產所建。自曾祖考妣以下至先大夫。木主在焉。榱桷几筵。規模略具。旁室數楹。非祭時則爲余斬馬練經計。無復之乃。啟室以處。而太夫人靈柩亦自京至。泊乎窀穸事竣。然後從容貸貲買屋。安頓妻孥。向無此祠。則萬里星馳。面顰骨瘠。必將僦居老子之宮。浮屠之室。其爲狼狽當更何如。然則祠堂之建。不但安先靈。且以庇子孫。顧不重乎哉。今世豪家巨族。貲厚而丁繁。則有宗祠之建。然不過千百之什一耳。其家中貲而丁稀者。不能逮丁繁矣。貲豐矣。子孫愚不肖。各顧其身家。則惟房舍之是營。服用飲食之是謀。妾媵婢僕之是置。問其祖宗之木主。輒閉諸僻室。或寄諸庵觀寺廟。久而失所在者。比比然。桐臯李君。余奉諱時識之。家僅中人貲。鄉黨自好士也。所居在城西之忠孝里。巷陋而屋庳。因自先世所居。不增飾。不他徙。人稱忠孝李氏焉。李氏爲宋尚書右僕射。同平章事。沆文靖公之後。隨宋高宗南渡。歷元明以至今。門祚衰薄。高曾以下無服親。顧有家祠一區在盤門內桐臯大母倪。

旌表節孝坊旁附供祖宗木主祠甚卑隘且年久傾圮桐臯念旁無期功親矢志獨力修擴節其衣食之餘庀材鳩工猶尚不足乃棄去贖田百畝約銀若干於祠右買屋一區又闢地數畝為饗堂為祖堂為後圃緣以周垣覆以前堂墾池浚井略仿跨之雜植花木春秋享祀必潔必誠月夕風晨掩映幽敞可以妥先靈可以教子孫桐臯之心異乎世之擁貲而忘其祖且日營營于居室服用飲食妾媵婢僕之為者矣余喜桐臯與余有同志且其祠在余家祠之南相去僅數百步花開菜熟將時時攜杖往觀焉故樂得而為之記桐臯高祖隆吉公邑庠生曾祖大成公常熟庠生大父維清公父荆山公俱未仕大父早歿旌節者其配倪也桐臯名鳳生讀書未成納貲為吏初試署錢唐縣丞丁父憂歸今不復出矣

左都督趙公墓表

李嗣

趙氏於吾金鄉為舊族。居縣城西。世多隱德。至都督公。由行伍起家。屢立戰功。位通顯。終於官。歸葬於鄉土。葬之日。無行狀志銘。有傳載。邑乘歲庚申。吾友周君清鑑。為余言曰。吾鄉趙都督。有曾孫繼齡。視履皆病廢。且將老。深懼其先德缺於表章。已伐石磨龕。謀樹於阡。余為徵其世牒。及敘功事實。而以文屬子。其毋辭。蓋距公之葬。已有年矣。按公諱永吉。字長山。曾祖曰尚德。祖曰東衡。考曰之漢。皆以公貴。封贈榮祿大夫。左都督。公生而奇偉。膂力絕人。性尤卓犖。不羈。當康熙戊午。聞逆耿精忠叛。煽動浙東溫台沿海。皆告警。公隨大軍往征。選驍勇二十八人為先鋒。公與焉。既接刃。迅擊之。賊披靡。於是海澄廈門金門城皆復。以功加三等。授守備。公在戎行。恒晝夜環甲。日月累不解。矢石如雨。亦不顧當其攻。漸山也。公忽受創。戰益力。飛馳入賊壘。奪其纛而麾之。賊大潰。我軍遂乘勝逐北。連破一十九寨。賊首受縛。以大捷馳報。仁廟嘉其殊功。議加十九等。授左都督。武臣值承平之日。邊陲無事。士卒甯謐。則弓矢可棄。步伐不講。而或以資倭。或以廢罷。累歲可以躋專閥。擁重鎮。而戰績無聞焉。如公之功。殆卓卓罕見矣。公既以左都督銜管江西南昌營。遊擊事。丁父憂。未及回籍。而妖賊袁大相聚眾謀逆。撫臣素知公。就衰經中起。受任捕賊。公偵知賊眾方

於深山歃盟酣飲乃約日選師議討倏於是夜自率家丁數人攀藤歷險突入其阻賊不及覺而渠魁七人已成禽餘衆悉平越歲授饒州副將會征準噶爾督運軍糧調陝西花馬池副將攝總兵官事軍民立生祠祀之蓋兼多惠政云公卒於康熙四十五年七月初六日年六十二歲配吳氏封一品夫人子二人長錫純例監次錫佐例貢孫男七人珽致珽玠珣璧孫曾孫一人繼齡余與清鑑感繼齡之孝且誠而不欲沒公之功也故為文以表其墓墓在城某鄉之原

復社姓氏錄序

秦瀛

古者聖王之世道一風同有庠序以萃天下之士有禮樂以陶淑士之性情於是上之政教出於一天下之士亦出於一三代而降上之政教既失由是人自為師家自為學分門別戶而標榜之風漸熾非天下之幸而亦非士之幸也東漢士崇氣節有甘陵南北部之稱范曄宗為之傳厥後黨錮代興至於明而東林之禍烈矣維時士大夫之家居者大率聯數輩之會各樹壇坫及其季也東南名士倡為復社幾社應社聽社諸名爭尚聲氣遙相應和以激揚清濁而復社之名尤著復社者太倉張天如溥吳縣楊廷樞維斗貴池吳應箕次尾吾邑顧子方臬為之魁而留都防亂公揭則子方名居首以攻阮懷甯大鉞既而大鉞材用欲盡殺異己者於是次尾等皆逮捕下獄於戲天地開賢人隱使諸人不幸丁陽九之運見幾明哲為徐穉申屠蟠必不致激成清流之禍然當是時國事良解三百年養士之澤已蕩然無餘而僉士猶日尋報復荼毒士類以訖於亡君子論其人亦可以知其世矣復社姓氏錄二卷為孟堅吳氏手定本孟堅次尾子也孟堅子銘遠復參以朱竹垞錫鬯所錄吳氏扶九本為補錄一卷而附以防亂公揭姓氏錄中諸人或後先死國難或不即死而高採薇之節屏居以終尚已乃若周鍾陳名夏龔鼎孳張覲顏倫生固修晚節而其始亦

得溫廁社中。豈其能於厲名節於始。而不能持其後歟。抑復社聲氣大廣。附之者不必皆君子。其初本有未暇慎擇者歟。觀是錄者。又可知儒者立身自有本末。而不繫復社姓氏之有無也。桐城胡君處得是錄於武昌志局。喜而錄其本。余亦為鈔而存之。並序數語於簡端。以為後世考鑑得失之林云。

海潮輯說序

海甯俞君潛山撰海潮輯說成。學使儀徵阮公為之序。復問序於余。余惟古人不兩序。且阮公博通古人之書。兼明西洋泰西之說。論潮汐盛衰之理。著於篇者。其備尚何待於余言。顧余方為海防進講。求於潮汐之盛衰者。又宜莫如余。蓋古今論潮汐者。不下數十家。而說者俱以應月之說為長。以余論之。要皆元氣之所噓吸也。淮南子云。積陰之寒氣為水。水氣之精者為月。水也。月也。其所以宰乎水與月者。氣也。無氣并無月。又安有水。惟天地之元氣。無乎不之。故上積氣而成月。下積氣而成水。水也。月也。皆氣之陰者也。陰氣之所結者為象。月有盈縮。潮有消長。所以盈縮消長者。皆氣也。夫水如人之血脉。然氣生血脉。血脉又生氣。有氣斯有噓吸。而潮即水之噓吸也。或曰。潮信有常。一日兩至。而早暮不愆。其期者何也。余應之曰。天無言也。而四時行。寒暑之不忒。晝夜之不差。問之天。而天不知也。脫令應寒而暑。應暑而寒。應晝

而夜應夜而晝則天行乖而天道亦息如是而水之有潮盈於朔望虛於上下弦息於朏朏消於朏魄其與時盛衰者亘古弗易又何疑乎夫雉應潮而鳴蟹隨潮而解甲物類之相感乎氣者尚然而又何疑於潮之消長乎俞君是書甄綜博而採擇精其論固亦主應月之說而謂潮之所以往來則氣之升降為之君之言似與余論相吻合古今論潮無專書是書出其必傳於世無疑君少工詩為人倜儻有風節晚治經海甯之言學者必稱周先生松霽與君二人松霽亦交於余云

周松霽詩序

海甯周松霽先生老而好學與余為忘年交屬其猶子彥曾請余詮次其生平如韓退之之傳何蕃余惟古人無生而為傳者如何蕃傳方松卿本題為太學生何蕃書蓋李漢所編本次於書類孫樵書何易于亦然他如柳州集中諸雜傳又係別體非傳例余既諾彥曾請遲之未及為會先生寄詩集至讀之卒業乃參傳體而為之敘曰先生名春字楚兮松霽其號自其祖父兩世皆以孝友稱家富藏書不下萬餘卷先生少羸弱與其兄玉井君同塾皆好讀書朝經暮史自為師友年二十餘以乾隆庚午舉於鄉甲戌成進士注吏部籍閩十餘年始除縣令方其成進士而歸也益務深湛為有用之學而性情冲簡不樂就選人適玉井君以乙酉登賢書初先生北上

遂以丙戌除廣西之岑溪縣岑溪地荒陋先生至即立書院舉規以訓士士以嚮學嘗為文自誓告城隍神刻苦鐵廉節凡在岑溪僅二年揉邪哺窮人樂其政無何以丁憂歸岑溪之民如失慈母生祠以尸祝之歸後鍵闕著述不復出以其暇為詩長篇短諷多可存者人皆惜先生未究其用然先生學既足以用世而沈淪下僚無振而拔之者及其既退又無人焉為之推挽使得盡其志而被乎物而徒令其輪囷鬱律之氣見之於詩寂處安巷侵尋白首此有當世之責者所不能不任其咎者也顧令先生治縣不遽歸歸而復出縱其秩愈進而行古之道不免戾眾而背俗安知不顛踣覆溺而欲如今之從容詠歌豈可得哉先生少學於長洲沈文憲及天台齊侍郎息園先生故其問學皆有根柢著書甚具詳余所為杜詩雙聲疊韻譜序今玉井君久故而先生年七十有一雙鑠如曩時浙西之學者無不知海昌有周先生先生之為人固無待余文以傳即欲傳先生亦必求如韓愈孫樵其人者而為之序而余非其人也

揖峯亭圖記

自處州洄溪徑石門灘溫溪諸水以達於甌江而溫州郡城適當其衝睥睨壯麗為一都會郡城諸山海壇郭公築蓋翠微之勝環繞崑崙而回鵬山在郡城之西亦適

當江之衝。山故有亭。明成化年間築。見於郡志。今久廢。山之麓為廣濟廟。以祀宋熙甯年間神。神姓林氏。諱三益。溫之瑞安人也。乾隆五十年。郡人張國彪等籲請當事。擴而新之。爰即其地。增置臺榭池館。鑿山石玲瓏巉刻。而其巔有所謂揖峯亭者。俯瞰甌江。面掛彩華。巖巖諸峯。若相拱揖狀。時余同年吳橋方君林為郡守。取以名之。遂為城西名勝。癸丑冬。余以分巡蒞溫。閱四月。偕權郡丞山左焦君汝甸。謁廣濟廟。登斯亭。翼日張國彪等繪圖以進。將付剞劂。而請余為之記。且夫登臨山水。騷人墨客者之事也。士大夫官于其地。勤勞政事。宜有所不暇及者。然政貴養民。必先自養其心。心得所養。則優游寬裕。施之於政者。無不平。而登高眺遠。俯察仰觀。足以抒其鬱伊。導其悅豫。於政事亦不為無助。浙東山水。既甲於天下。又適當國家承平。百數十年。海上無桴鼓之警。年豐物阜。民氣和樂。余與僚佐偶以其暇。從容燕游。憑欄四望。撫城郭之鉅麗。睇山海之浩渺。當益思休養生息。所以致此盛者。而非僅供一時眺覽之娛已也。至於亭之左右。雙桂有堂。七賢有石。濯纓有亭。鑑池清冷。石梁鱗鱗。皆見於圖。不屑屑詳也。而廟之顛末。已見於前。觀察元和沈君樹聲所為記。不具書。

洞霄宮三賢祠碑

洞霄宮舊有祠祀宋李忠定公朱文公。後又有石齋書院祀明黃石齋先生。歲久祠及書院皆廢。嘉慶元年道士張禮恭重修洞霄宮。建堂三楹。仍奉忠定文公兩賢。栗主祀焉。桐鄉馮鴻臚應榴為之記。而書院則未有復者。閱一年。仁和宋學正大樽。何秀才元錫。李秀才堂。即附石齋先生於祠。而并祀之。洞霄宮者。南宋時人主優禮大臣。於其去位時。予祠祿處也。忠定於宣和中。繫天下重望。屢進屢斥。迨建炎初。數言事。又為張浚論罷。提舉洞霄。宜後人之建祠以祀也。文公立朝。僅四十日。未嘗奉有洞霄之命。而後之人並祀之者。豈非賢人君子。不擇地而人思之耶。至石齋先生。生明之季。嘗講學於此。宋檢討彝尊。具載其事。今諸君以書院既廢。奉先生以配忠定文公三賢者。後先並祀一堂。所謂禮以義起者也。余嘗論士君子之進退。繫乎國家之安危。高宗不用忠定。而兩河不可復。光甯不用文公。而宋祚即於衰。莊烈帝不用石齋先生。而明社屋。詩曰。取彼讒人。投畀豺虎。黃潛善張浚王淮溫體仁楊嗣昌之徒。則已耳。彼人主者。獨何為哉。雖然。忠定諸賢。蓋皆學孔子之道者也。經曰。任重而道遠。仁以為己任。死而後已。忠定有焉。又曰。國無道其默足以容。既明且哲。以保其身。文公有焉。又曰。志士仁人。毋求生以害仁。有殺身以成仁。石齋先生有焉。余不敏。備官於浙。諾諸君請為文以碑之。迺又為享神之辭曰。

撰吉日兮良辰開廣庭兮薦芳醕。繫洞霄之遺墟。徹蕭光兮靈宇。沂三賢兮在昔。佩長劍兮陸離。蘭當門而見鋤兮。薺菜施兮溷江離。吁眾女兮謠詠。羌嫉妬兮蛾眉。彼讒人兮高張雄虺。九首兮蟻含沙。叶國無人兮殄瘁。悵白日兮西馳。塞魂魄兮來歸。鏗鯨鐘兮擊鼙鼓。揚朱旗兮翠葆。採丹荔兮擷芳杜。維潭潭兮斯宮。永昭示兮來許。

安先生家傳

先生姓安氏。名經傳。字繼勳。無錫人。明萬厯中有南京吏部主事。贈光祿寺少卿。諱希范者。世稱我素先生。以建言名著東林。事具明史。光祿公子廣居。崇禎癸酉舉人。癸未乙榜。應得縣令。自免歸。甲申之變。痛憤卒。孫璫諸生。尚志節。以詩畫名於時。傳載邑志。文苑又三傳而至先生。先生少好學。居邑東膠山之卷畫樓。晝夜勤讀。年十六。通春秋三傳。尤長於左氏。既為諸生。為巡撫祁陽陳文肅公所。知檄送紫陽書院肄業。課輒冠其儕。所為制義。剴心鉅目。幽異奧遠。孤詣所至。戛戛獨造。如詩中之有孟郊。山長虞山王御史峻。亟賞之。居平至孝。母吳孺人貞苦節。先生請於有司。得詔旨旌門。如故事。吳孺人病。先生日侍湯藥。遽罷省試。孺人既不起。先生哀毀骨立。得羸疾。免喪甫一年餘。遂歿。年三十有二。悲夫。予族伯弱舫先生。名鈞儀。工於文。善持論。於帖括少所許可。每與予掀髯論文。獨亟稱先生。弱舫先生。故先生中表兄。而

又嘗授時文之學於先生者也。先生既早世。著述皆未就。所遺制義。其子孝廉吉刊行之。翁觴先生為之序。翁觴之文多艱響。先生之文多苦音。是以皆屯於遇。嗚呼。自帖括之學興。其幸者一蹴即獲。而憔悴專臺之士。往往槁項黃馘。而不得一遇。如先生者。操觚力學。至於耗精散神。并以殫死。其尤不幸也。翁觴先生歿。文多散佚。無人為收拾。而先生獨有子守其遺文。先生可不死矣。

論曰。予嘗讀光祿天全堂集。知光祿當勝國神廟時。閣訟方興。變亂白黑。光祿一再抗疏。卒以廢斥。為之三歎。集為先生所校定。先生有志正學。將由東林以上溯濂洛之傳。而天厄其年。可惜也。聞先生病既革。語其弟曰。亡後但日誦經書古文於帷前。毋作佛事。即是可見先生之篤於學焉。

書支貞女事

支貞女者。常熟農民支見龍女。幼字金匱朱燦燦。天貞女年二十四。奔其喪。誓死不嫁。燦所居地名羊尖。距城八十餘里。其俗多姦頑。逞疆為雄。然語及貞女。無不賢貞女者。眾議立貞女後序。推其夫同祖兄文耀子應垓。時貞女姑尚在。有田二十餘畝。屋八九楹。貞女上事姑。下撫稚子。無間言。逾四年姑歿。又三年應垓死。眾議為貞女他立嗣。文耀乃謀諸其族曰。材任者。材任曰。嗣殤以母。無母何子。乃賄女媒而勸之。

嫁且言汝不嫁將納強人汚汝貞女皆不畜文耀又謀諸材任百計辱貞女貞女日對夫棺泣族有舉人汝霖者知之召其族人具貞女狀聞於學使學使下學校官廉之果實書額以獎貞女文耀既莫可誰何材任豎一指語文耀曰黨黨者擊也羊共人方言由是文耀屢糾其眾擊貞女貞女泣赴淵將投淵遇其弟支錫昌而告以故且曰爾畏朱氏暴不敢過羊共而坐視我死我死而白諸天錫昌曰邑有令公在不生白之而死白之乎乃偕入金匱縣城而訟諸令方貞女之拒女媒不嫁也文耀有姊嘗假貞女穀而貞女母家舊傭人黃催又假其姊穀數相等也其姊謂貞女我負若穀而催負我穀請以催穀償若穀而令而弟索諸催其便貞女諾之文耀乃揚言貞女陰以穀贈催冀以汚貞女材任率文耀男婦碎貞女腿劫貞女出嫁催貞女大呼取剪刀欲自戕鄰里聞貞女呼聲急急擁入救貞女得不死貞女訟於令口訥不能具狀令捕文耀不至三捕之始至既吐實眾跪階下置材任非人類堂下環視者數千人皆裂眥欲噬文耀面令先以大杖杖材任文耀案朱氏譜擇其族文熙子守信母貞女先是文耀有族弟連修者與郡倖子有連文耀嘗因連修誑倖以消令比令直貞女倖遣人貽令書屬綴其獄是時黃催諸姦人悉自常熟繫而至將與材任質文耀自陳壽倖若干幣又嘗書貞女與人私誣罔帖子若干紙貞女眉豎目裂即

解衣大呼求賜刀剖胸以自明。無何文耀轉訟于學使。學使怒下郡守鞠之。郡守議材任文耀當流竄。以事在赦前。從寬典。倚校通衢。錄各予杖焉。貞女貌端謹皎晰。舉止嫻雅。勤女紅。歲時祭祀必潔。嗚呼。貞女生農家。非必有保姆之教。而貞義激烈。本諸性生。蓋孟子云。人性皆善。於女子益信。獨材任諸人。百端辱貞女。不死不止。豈前卿所謂性惡者耶。然人莫不賢貞女。而惡辱貞女者。此天理之不容終泯。即人道之所以常存於世。而即聖王之所緣以為教者也。

教胄子論

呂星垣

昔者舜咨禹宅百揆。命棄播耜。契敷教。皋陶明刑。垂共工。益作虞。伯典三禮。其於治天下之具畢舉矣。終之命夔教胄子。蓋舜治一世之天下。以此終。治萬世之天下。以此始也。胄長也。自天子至卿大夫之適子也。皆將有天下國家之責者。故不可不素教而預養之也。故樂正崇四術。立四教。順先王詩書禮樂以造士。春秋教以禮樂。冬夏教以詩書。王太子王子羣后之太子卿大夫元士之適子皆造焉。由此道也。故上無縱慾敗度。顛覆典刑。墮喪神器之主。下無蕩檢踰閑。殘民殄物。毀家病國之臣。廷祚一家。保艾天下。孟子曰。為天下得人者謂之仁。此之謂也。秦漢三國以後。司馬氏混一區宇。父子兄弟互相殘夷。倫理既虧。禍變斯亟。一時公卿世族。崇習虛元風流相尚。浮薄敗壞。迄乎過江。固有底止。沿及南北。割據戎馬。倉皇間或粉飾圖書。卒未嚴立保傅。父兄艱難締造。子弟玩愒消亡。揆厥病根。均失豫教。蓋由逐鹿之初。武臣勦力。遂以數裔聯戚。怙寵朝東。符節暮盡。方州嗚呼。殷鑒不遠。何其弗思甚也。此在開創甫定。即當建學明倫。長慮却顧。沉乎其繼世有天下者哉。夫齒胄體乾貴乎金聲玉契。而與國休戚亦貴喬木世臣。三代世祿之典。雖不行於後世。要其所與戡定削平。顧命定策數人。其子孫苟無大過。世王亦不忍廢棄。顧使其僅足於達長窺伺。

則不才者適以亡國敗家。僅足於小信小忠。則才者亦止於出納奔走。而下此益不足言矣。唐宋後家法相傳。典崇教胄。唐太宗讓帝範十二篇以授太子。宋真宗亦讓元良箴以授太子。其有鑒歟。卒未聞廣教胄之典於卿大夫之適子也。五季紛爭。又棄厥典。上如置碁。下如沸釜。禮樂不興。民無所措手足。其謂是歟。故治有基於興學一事。而仁及於天下萬世之國祚民命者。必自教胄子始。

樊噲論

昔漢高帝病。樊噲擊燕人短噲。帝使陳平即軍中斬噲。平執送長安。帝崩。噲復爵邑。以孝惠六年薨。蘇氏曰。帝欲斬噲。安劉噲以孝惠六年死。漢幸也。使孝惠十七年噲不死。則太尉不得入北軍。諸呂不可誅矣。嗚呼。非知噲者也。有先天下之明。必有蓋天下之氣。貞天下之節。方帝入咸陽。欲止宮休舍。樊噲首諫。有先天下之明矣。及項羽破函谷關。臨灞上。羽兵四十萬。號百萬。帝兵十萬。號二十萬。力不敵軍中。皆驚。噲獨參乘至鴻門。事急。直入譙護羽。羽氣折。有蓋天下之氣矣。富貴不能淫。威武不能屈。獨以真主事帝。有貞天下之節矣。至漢天下大定。諸反者悉誅。噲之見益明。氣益壯。節益老。漢之為漢。呂之為呂。辨之明矣。日暮倒行。噲必不然。且洵所疑噲者。妻呂嬃也。夫噲欲叛。無呂嬃亦叛。噲不反。足治諸呂。反。使孝惠十七年。噲尚存。呂后必輕產。

祿而重噲。以北軍授噲。噲必陽附。產祿以探其意。而徂其功。陰合東牟。朱虛以誅諸呂。則一廷尉事耳。大難夷前。而兵不入殿門。昔樂羊殺子。吳起殺妻。古人功名未就。尚不愛其妻子。噲與帝同起布衣。後且封侯食土。傳國子孫。其所以報帝者。豈呂頤可奪哉。方黥布反。帝病枕一宦者卧。大臣拒於門。噲獨排闥入。流涕而諫。悚以趙高。帝為起。由此推之。婦人女子。不足困真英雄矣。洵又曰。噲推埋屠狗之人。一旦見其親戚將為帝王。必靡然從之。其所見益鄙矣。無論噲之識必不出此。即使助諸呂滅劉氏。盡滅劉氏之功臣宗室王侯諸郡國者。以立呂氏。亦不過封侯食土。傳國子孫。況乎劉卒不可滅。呂卒不得立也。嗟乎。噲之忠可不必辨。必辨者。蘇氏之惑耳。噲無論。蘇亦無論。獨怪後世稱漢高深謀遠慮。能保子孫。以為存周勃以安劉。存呂后以治諸將。夫使存樊噲。則周勃不必入北軍。而帝且欲斬噲也。立趙王如意。則戚夫人生。呂后必死。國疑主少。天下非漢之天下也。則帝固非為子孫計者也。

雉草說

春雨浸灌。庶草蕃生。決旬之間。蔓階入室。迨暮就明。讀書不可以足。乃弗克姑息滋長。使童子鏡之。乍雉乍艾。童舍鏡而嬉。以蛇竹也。雉筍。余往視之。蛇竹筍狀者未艾。萌似艾。忘憂似蒲。半雉。他不辨甚夥。余乃辨而使之退。而據几歎曰。天下之似是害

正豈少哉。草而神。莖亂莖。難。蘇亂莖。高亂莖。蓬麥亂莖。木而米。樓為槐。槐為葛。樓為
樵。杞柳為楊。鳥而鷩。鷩作雀。鷩作鵠。頭鷩作鳥。鷩作鴈。獸而駘。駘駢駢當駘。慶
當駢。虎當彪。彪蛟當龍。鱗介而錯。蟠亦素。厥醜類。天地乘陰陽。施生物。乘化盛衰。聖
人靜觀陰陽盛衰之機。一使邪不害正。故名以區之。別乎蕪囊。鵠隄螭螭。螭螭之鉅
細。立乎衡虞。駢駢服不射鳥之大小。以用乎檣楯。兵矢繒弋之張弛。而物變常出於
聖人制數之外。戾氣擊毒。陡出資薄。逃形鼎圖。衍種地魅。昌若欺嘉。各據厥候。或幻
妖惑。天喬肖人。厥走迺立。顯悖物恒。被除尚易。乃更隱揚。諱諱迷迭。龍從甘肥。滑澤
導為湯恣。逞壓滿質。極慾薄蝕中和。是皆不辨之故。雖然。是之辨。辨未及其大。昔仲
尼貌似陽虎。王莽貌似周公。匡人不辨也。漢天下不辨也。貌似故遽釋圖。貌不似而
似。竟易龜鼎。故內小人外小人。易辨。內小人外君子。不易辨。故蛇竹始出。似筍。何責
乎童子。故辨姦貴辨其始之未為姦。苟萌芽勃發。肆達上干。強枝幹。奮鱗甲。舞牙爪。
勢急撐拒。牴觸攫綢。而搏噬固弗辨。辨亦難。翦除。況其為姦於不得辨。故辨而童子
可使者是類。不辨而童子使。雖是亦害。天地生物。不物其物。亦不人其人。柔似仁。俠
似義。易似禮。偽似信。詐似智。諂似恭。審似儉。計似直。矯似廉。君子循性。終其身安定。
若思小人。強襲于鄉國。歲月間。蘊隆鬱積。以乘其運。士不辨。害及身家。人主不辨。害

家國天下嗚呼不辨而使童子敗乃事吾知其幾

承德堂四子序

右管子二十四卷八十六篇商子五卷二十五篇慎子一卷三十七篇韓子二十卷五十五篇缺篇各列篇名新建呂泰青陽手鈔纂校以授其弟子袁熙載熙載寶而藏之篋中者數十年乾隆壬寅與呂星垣遇於大梁出篋相示其另行低二格字皆青陽從他書援引皆謹嚴辨晰熙載屬星垣序之星垣曰甚矣子之愛其師也甚矣青陽之志於古也昔周道衰王迹熄聖人之道不行於天下於是刑名法家諸子競起以趨風會之變極權數之奇賴仲尼出而昌言之尊二帝三王之道定易詩書禮樂春秋之經於是乎先聖先師之大義微言不奪於諸子百家之說歷漢唐宋諸儒既家喻而戶曉矣然星垣竊以為滅經不可滅諸子不可竊謂秦漢以後天下之變皆肇端春秋戰國之前而天下後世之才究不能凌春秋戰國之諸子而出其上使仲尼治春秋戰國之天下必召諸子盡其用況乎治春秋戰國以後之天下也況乎其非仲尼而治春秋戰國以後之天下也惟仲尼用諸子耕使奴織使婢器而用之權其無可用者舍之耳竊謂諸子之言皆精言見極其於聖人一間未達耳願子於聖人全體中一間未達諸子於聖人一曲中一間未達耳要其立體也並能深察洞

見其所以然故其適於用也各能預揣立程其所為效決其要亦能深得乎尊美屏惡之用心惟聖人求自然之功諸子祈立然之驗此其所以異也然廣之曰天下之大約之曰一人之身平居血氣調和官骸流暢參苓者不雜進亦資養生苟腎亂清裂不瞑眩厥不瘳則大黃芒硝蝻蛇毒蝎之材亦當亟取責效惟虛耗消竭之急善其後耳怯者動色戒但求擊鼓召巫其弊也黜管商進黃老雖孝子慈孫曷起其祖父之危殆夫管商濟春秋戰國之強侯黃老敗晉魏之天下其利害不較然判哉今青陽用意如此其志於古不淺矣予愛其師必欲彰明之亦即青陽之志也夫

遊天平山記

太行千里蟠中州昂首河北曰隆慮隆慮極峯惟天平天平麓千峻由慈明寺登麓辛丑三月望前四日余於寺蚤起盥洗飯已入山西行攀藤捫壁上憩環翠亭望六峰秀絕怪石如獅蹲象舞山合四圍聽泉辨徑沿石甃泉入歸雲洞石勢益奇瓊瓏蟠結若斜風吹烟橫披若迴飈卷霞上舉迤邐北轉豁然空青石梁虹竄則天漢橋也返顧來還雲山蒼蒼千曲萬疊不可辨過橋聞雲端鐘聲逕造明教禪院院僧煮粟飯瀹松子茶出院北闕松籟振地僧曰北去為萬川亭遂從一僧一僮往見天平王女諸峰各發泉數十派折而東又西又北又東曩崑閬溪激激迅利一暢於萬川

亭北瀉者合數百鼓鐘鐸考擊東渟者數千磬泠泠然秋清蟲鳴協奏絳竹登亭上翫川臺金攬其勝徘徊山光潭影間心從山空目與天遠忽若羽化蛻解僂捷於猱倏升南崖折而下折竹為杖授余道通勝橋出複壁至金縷泉日華晃蕩人行橋上類披錦衣過橋虬松拔地千尺數十人不合抱枵腹容席環根為門出松頂上玉女峰入玉女洞下窺鳳尾峰石勢益詭密於華攬散若柯列若仙靈鬼怪具支體若鳥啄獸逐雲起浪涌不可殫狀亦多異木異鳥遂登玉女樓望進珠簾錯落懸掛時隨松風灑面靈意怳怳然沿厓聞琴筑聲則珠泉會松心澗南駛矣僂導余出澗轉日仄峰望天平峰山入天中碧雲四合丈人衣冠高眺眾山拱揖如兒孫余瞻仰久之饑渴甚乃道鳳尾峰險逕取捷坐漏天巖餐石乳柏子歸明教禪院余尚能登樓僂僂余下樓僂僂曰甚矣子健吾生山中不予若雖然子於厥明將登天平峰觀雲海子且休余曰不然子故健恃其健故僂吾不恃吾健故勝子然余寢後甚僂厥明不能興越日夜半起乃挾僂與道人登天平極峰觀雲海作放歌

龍井遊記

昔人記遊有為山水記者有為遊記者有為羣遊記者為獨遊記者深山絕澗扼險阻幽開闢以來人跡不到到者愚蠢未言其奇則為山水記名山水出大都通邑既

疏既剔昔人言其奇則為遊記遊而朋簪集則為羣遊記羣不如獨獨遊乃極其勝於是作記往往言昔人未言之奇龍井在延壽山風景嶺幽險絕昔惟秦觀記言其奇觀曰泉德至矣美如西湖不能淫之使遷壯如浙江不能威之使屈獨受中資和養其源彼岸湖之山為湖誘不克為泉岸江之山為江脅不暇為泉惟此蟠幽踞阻故嶺左右大率多泉龍井其尤者也觀言善矣向亦以觀為能言其奇及余獨遊龍井歸乃嘆觀之言未盡其奇也雖然余不獨遊亦不能極其奇言之乾隆戊申余客盧存齋運使距湧金門一里余又董崇文紫陽兩書院課不與聞醴政故常泛舟湖中盡四時雨晴之勝六月十八日存齋詣海甯幕下諸君並出湖上余獨辭諸君往宿寶石山莊及午大雷雨登樓望湖浪湧波鳴雨一尺抵暮止黃昏月出泛舟荷花中賦湘月一闕五更聞湖寺鐘聲三健足昇筇輿扣扉余即乘輿去道雲林天未曉所過澗壑射目震耳健足云比歲少此大雨故泉長異常天明至積慶山麓山家炊飯飯已余厚齋健足健足喜曰凡子不克登者掖子登顧必除冠服從之乃由過溪亭至浣花池捨輿登山健足葉姓故為龍泓寺僧治圃從之登由池西崖逕升龍泓澗懸瀑二尺許垂地一丈葉曰雨助之故爾旁度風篁嶺窮源澗後方塘龍池瀉池水落前澗如閘循池過方圓庵上聽泉亭見源是為井井水澄映曲流注池亦無他

奇漸至井旁四面望之奇絕玲瓏斷別若女繡工錯其滲綠暈黛亦肖龍眠工緻筆
亭左神運石蓮舒雲卷尤奇又左為清虛靜泰折而東出簷岡坐北屋間仰望駭絕
有瀑為白龍數十自東北亂峰中劈裂而落衝石穴為百萬金鼓聲穴無潭跳而出
離地三十餘步落為水橋駛澗曲折奔流至過溪橋出麓余乃袒卧行穿水橋以東
入水不濡境非人間既下滌心沼又上一片雲亂松岫越縹垣由後山登巔至翠峰
閣觀湖山第一佳泉之分合伏見畢見蓋龍泓之奇於此窮非隔宿雨感亦自地厓
天隱不得見余時徘徊於湖山第一佳如相工揣物周覽全山泉石之奇外山峻嶒
湧起都無甚奇奇者皆在縹垣內外惟北山後兩石有幻態亦不及井旁蓋唐宋來
歲久湮廢乾隆壬午年

上奉聖母南巡普天慶擬杭之臣民乃即其地闢佛場經筵以申釐祝故湖沿元豐
恢廓唐宋萃山之美縹以周垣如舉網得魚鱣鮪魴鯉及文鱗纖蛤諸品悉無遺於
網之內其蛟龍鼉鼉神鰲怪物聽其張著鼓甲於長波高浪間此山之不雨無泉亦
美者若夫雨盛潦集天特為茲山一呈其奇杭人十萬戶類各閉戶偃息孰攜屐至
湖上遠而尋幽西極龍泓山僧樵夫生長下上其處則習見之而不能言即能言之
亦不肯言之士大夫致雨霽石滑僕僕送迎兼為達官貴人之僚從諾屬然則茲遊

也。余所獨也。余亦賴健足三杖一草屨二兩，遂使葉道以下日色未晚，仍遊黃雲洞。歸而歎秦觀之記未盡也。昔人龍泓雁蕩並稱，余今悟雁蕩之泉生於山，龍泓之泉來於天耳。生山有跡，來天無端，世或有奇士而眾皆奇之，要之眾人所奇者，非士之奇，其龍泓澗歟？其知之有其時耶？有其人耶？吾不得知也。然則余之記獨遊也，勝於羣遊，記遊也，即記山水。

道場山讌遊記

柳州記遊之適曰：興如曠如。余登臨每服膺其言。及遊道場山，覺是遊之適有非興與曠所盡者。不興自幽，不曠自遠。昔人謂吳興山水清遠，庶幾得之。山以水清遠，水以山清遠。山水以眾山水清遠，山行水行，其情畢見，見不能盡，去有餘思。戊申仲春兩霽，李平山明府汪鏡湖別駕邀余及吳子蔣子出南郭，放舟三里至峴山寺，升閣觀藏經，由寺西湖峴山麓登石坡，觀窪尊，即僧皎然偕顏魯公陸羽吳筠賦詩處。上浮碧亭，見碧浪湖全湖在目，遠見湖左右夾岸羣峰斷續起伏，下山麓行三里道小浮玉山，孤山一石，即趙孟頫種梅所。又七里至道場浜，駕筍輿一里登山，由嘯月亭至伏虎道場，葉輿行約千餘步，僧如訥伏虎於此，故名。又西北上萬佛閣，越放生池石梁，玩一勺泉，折而南百九十步登華光樓，伏虎巖在其西，又百四十步憩仰高亭。

遂至望湖亭。登亭展眺。心目開朗。興區三十六萬頃。起而搖蕩於亭內。澄湖數十峰。卧而低昂於湖中。遠帆不動。不旋近渚。寸網且人。歷見動作如繪。諸君乃席地傳觥。命從者采木實行酒。酒酣。余謂平山鏡湖曰。下臨太湖。遠攬羣山。山平水遠。夷猶滄蕩。與靜者宜。昔賢惟張志和。著笠簑衣。終身鼓枻。盡其趣自逸。少至東坡。皆寓公耳。平山曰。此水北流為苕霅。吾飲之七年。行去此可慨也。鏡湖曰。吾行買田陽羨。結茅於山。湖湖遙望。尚可見之。余笑。浮白觴座客曰。天下望者之適。孰與見者之適。苟不適之於見。望亦何能見也。且望而見。彼自適耳。客喜盡醉。各離立倚檻下。瞰金盞回。辨石林。少焉雲數十畝。倏來。懸雨數十簾。倏去。竹樹炫耀。山草生香。醒酒若失。乃蠟屐歸。寺僧欲留待月。會鏡湖將赴杭州。遂登舟解纜。同人或詠或歌。或坐卧。余獨憑舷玩清流。俯仰沿迴。與山送迎。山容水色。若近若遠。若夢若醒。烟水迷離。千態萬狀。前望屋回灘轉。後望舟子理棹曳足歌謳。風微月出。如魚空行。去山既遙。益流連冥想不已。既登岸。抵烏程官齋。翦燭記之。

寶相寺記

出宿松縣東門十有五里。曰白馬河。河干有寺。不知所始。府縣志皆稱三祖燦建其像。設居門者。相傳唐人所為。因名曰寶相。先是寺有田數十畝。寺僧率頑惰不事事。

田屋廢頽鞠為茂草鄉人聞僧淨輪賢方自力作初居藏經庵因禮請來主是寺淨輪辭不獲既至慨然曰吾力能興復之方是時寺荒落甚矣前以土樓門後屋一區上漏下溼狐狸嗥於佛座鳩雉鳴於鐘磬人厭聞淨輪言笑不信者半不數年成堂堂中增新大像三小像五不數年成門門中像復其舊不數年成室室中賓客之位倉庾庖湢經籍之廚無不具於是所謂寶相寺者煥然改觀父老相與咨嗟太息曰吾及見此寺未嘗有此也淨輪請予為之記余不多淨輪之能興復是寺而獨喜其所以興復之力皆出於力田而不以乞化布施煩吾里人也宿松田瘠而賦重安慶屬縣六宿松次五其廣輪不及懷甯桐城遠甚懷甯桐城田皆三千餘頃宿松田則至四千四百餘頃志稱明令屠叔芳虛增畝額求媚上官後不良於死宿松之民至今蒙害未已也他邑田皆恒產宿松田懼為累民所以貧困而不可救田既為累故逃亡恒多力田者恒少農事不修率以惰廢為常夫有田而不力田歲賜其復無益也况重賦乎宜乎宿松之貧且困也詩曰三之日于耜四之日舉趾此西北高寒氣候不同耳若東南則未有逮春始耕者也宿松濱湖冬逐魚蛤之利棄田不治始春乃耕矣詩曰載芟載柞其耕澤澤必芟柞其草木以蕃藏之而發其土膏未有徒耕者也宿松舉耜覆土猶或不全蓋無不徒耕者矣詩曰千耦其耘徂陞徂畇蓋始則

周行吟陟足治草之萌芽使不得生也。又曰其縛斯趙以媒茶蓼。蓋繼則操持利器手壅草之無藏使助榮滋也。宿松則有植而不芸芸而不復至田者矣。田且如此其他一切溝洫蠶桑畜牧之法皆置不講然則民之貧且困也情廢之害未已也不盡屠令加畝之罪也。淨輪初至寶相寺稍因其寺之舊田而力治之蓄其餘而漸買其附近之田燔燒其草木而覆以土漬以盥浴食飲之水以為之糞鋤併其田之奇零以拓大其畝域平治其崩弛磽确之餘以就其耕。貧沙雜土築隄防以瀦其潦水蓋無寒暑燥溼雪霜而不履於田也。故收田之入治五材鳩五工不十餘年而事集然則宿松之田何嘗為累哉。雖以屠令增畝之重而淨輪力而治之猶足賴如此。又何患乎貧困之不可救哉。余攷天下稅糧莫重於蘇州松江然其田畝直十金以上宿松則畝不過五六銖而已甚或棄之聽人耕又甚則出錢以資受者求脫田而去則甚矣宿松之貧且困也先王之法有力田之科惜也淨輪逃於佛倘非然者舉之為吾邑農師庶顏俗其可救乎。曾子固謂佛氏之徒不撫耒耜累百十鉤奇飛貨以病民若淨輪者甯有是哉其所收徒多寡人棄子撫於乳幼之初而時養其父母其鄰人貧者常需其餘以濟淨輪其賢矣哉抑非但農師已也余故因其請而推論之為邑人勸毋徒以增畝罪屠令也淨輪持戒律甚嚴通內典法邑士君子皆與游。

襄城子產祠碑記

太谷杜進士昌炎將自內黃移襄城貽書謂襄城即鄭之汜至漢置邑名襄城有子產祠久圯不治余往將修之以攻吾媿子其以吾意記之其道所媿之意略曰子產猛濟寬威濟惠者也今之縣令酷濟貪者也子產化盜為良者也今則驅良為盜者也存心曰寬及物曰惠內果曰猛外嚴曰威寬而不惠者有之矣與其不惠并不寬且爭用心之寬乃反其道而欲攘民之惠以自利則勢不得寬勢必反用乎猛與威之權一出於酷推其存心不驅民以至於盜不止故刀鋸鞭杖治有罪懲有過之具或懸以示或試以嘗遂使無罪無過之良民文致以罪與過驅而納諸罟獲陷阱以為之出入此非子產之罪人也歟若是曰心媿又曰心不媿子產難矣沈浮闕冗懦不振廢不興不講於興革利弊之故若是曰政媿子產治鄭使都鄙有章上下有服田有封洫廬井有伍忠儉者與泰侈者斃今縣門內外胥役任縱無章何論都鄙僚佐屏息從縣吏胥指授無服何論上下農功廢而役里車閭黨散而逐末務焉論溝洫與伍是皆小者窮閭閻樸各治生理忽不知舉手動足觸墨網羅有刁健險滑之徒因緣胥役作姦犯科橫生事端魚肉鄉里威宮室車服考鐘鼓肆歌舞不肖者不加擊斷反賴其利己而震其泰侈以為豪四境中有一於此其媿子子產又何如哉

余讀之喟然曰書之言善矣吾即有言何以過此遂節書其言歸之

湯陰嵇侍中祠碑記

湯陰城西南隅奉祠嵇侍中墓即在縣南浣衣里宋韓魏公因縣令張懋修祠
謨書修廟碑紀事今彰德太守盧君崧修祠屬某綜本傳作紀泐石務闡前古未及
者某作紀曰晉永安元年七月己未惠帝北征太弟穎穎遣石超距命王師敗績于
蕩陰侍中死之血濺御衣帝哀之冊贈侍中光祿大夫加金章紫綬進爵為侯祠以
少牢元帝賜謚忠穆祠以太牢歷代奉祠不廢公考諱康字叔夜先世譙國鉅人異
姓避怨家嵇山遂命氏叔夜公龍章鳳姿婚魏宗室拜中散大夫修養服食慎言行
見晉賊臣鍾會不為禮會傾害之公諱紹字延祖十歲早孤孝於母痛父靖居山濤
薦徵秘書丞遷汝陰太守轉豫章內史母喪除拜徐州刺史給事黃門侍郎以不阿
賈謐封弋陽子遷散騎常侍領國子博士嘗駁太尉準謚駁故司空張華復爵惠帝
反正直言極諫又切規齊王冏朝野震驚冏敗徵為侍中帝從六師請使都督執節
平西將軍討平長沙王又旋以侍中護駕北征殉節蕩陰綜本傳記公如左按晉殺
公之考不以罪國子生徒三千人請免為師不得海內寃之或疑父不受誅子必報
讐公不得仕晉忠晉解之曰非也公之考果以婚魏逃晉則公不得仕晉公之考慎

修高尚。並未以婚魏逃晉。則公必仕晉。事君不忠。非孝也。則公必忠晉。公仕晉。忠晉而公考之死。非罪。不受誅。益明。而晉文帝之失刑。益彰。而晉賊臣。鍾會之以私憾陷天下才。益著。殺其父。用其子。父子皆有罪。曰濟惡。父罪死。子功顯。曰蓋愆。父死。冤子死。忠曰雪冤。盡忠。載考之經。昔在虞周。繇殛禹。與囚蔡叔。封蔡仲。禹與仲不逃虞周。此為父得罪。不得例公。公考固無罪。降而考之。左氏春秋。列國殺其大夫。大夫不受誅。而稱國以殺。罪累其上者。其族其家。傳不著其後者。無論凡大夫。不受誅。而著其後者。無經之傳。一有經之傳。三據此而斷。公必仕晉。忠晉。成二十年。楚殺伍奢。奢東正無罪。其子尚奔命。免。父子員奔吳。復讐各行。其是傳書之經。不書。孔子意不欲兩是。故從闕歟。以此例公。公可仕可止。而不徵于經。經書襄二十二年。楚殺其大夫公子追舒。王先告其子棄疾。棄疾曰。與聞殺父。既請葬。遂縊。公未聞害其考。不得殉考矣。成八年。齊殺其大夫國佐。佐情中閹亂。大臣害。乃以殺慶克。據邑見殺。佐死。功罪參半。乃齊侯返國。弱嗣國氏。傳曰。禮也。而不為弱病。是公考無罪。亦無功者也。公曷不仕晉。宣十四年。衛殺其大夫孔達。衛穆將貳楚。從晉。故殺達。以說於晉。既而以達之殺。為成勞。達死。有功。無罪。復室其子。復其位。而傳又不以為達之子。病是公考無功。僅無罪者也。公曷不仕晉。忠晉。是當日公忠於君。即孝於考。遂為迎神之歌。曰。

與于侮虐於卧龍兮。御龍子而傷元黃。昔臨命而撫桐兮。今悼忠於冢裳。廣陵散而既終兮。甯表陳於齊王。正衣冠於侍中兮。早著介冑不犯之色於廟堂。

閔貞傳

閔貞有友曰申伯宣。貞嘗請伯宣為傳。伯宣曰。吾文不足傳子。吾他日必求文傳子。貞死。伯宣復遊京師。請某為傳。某書伯宣之言曰。楚閔布衣貞者。孝子也。貞精畫理。白描人物。卉木。造古作者。間亦賦色。追吳道子。李伯時。率意點寫。為唐六如。張夢晉。最工。士女善作。巨筆鈎勒。眉目鼻顙。益遠益妍。迺其神品。以其技遊京師。名動王公貴人。顧性僻傲。雖窘絕。非所願為。卒不能強之作。有顯者。閉餓之兩日。卒投筆出。人奇之。其所居室。懸雙冢圖。日拜奠。其親弗輟。有稱以孝者。輒恚。終身墨其衣冠。見喪其親者。輒多作繪。得金購之。有滇人喪於京師。兩旬三喪。遺棄幼孤七人。貞往弔唁。退謝客五月。作九子佛母圖像。應真比丘之屬。三千日為像百。辨明起漏。夜未已。鼻歛頭飛。魁詭譎怪。窮態極變。麟鳳獅象。龍彪。犼。兕。眼。背。鱗。爪。毛。羽。俱若生。又湍渤塞雲。飛聲風霆。薄雷火。震熠激蕩。旁楷刀矛戟之屬。示佛者以定力。安其間。所佈巖洞。湍湍草木。一皆自然。道勁縹緲。圖成。竟得重金。俾昇喪去。貞京師所作。此為第一。貞卒。不告人歸之何人。殆恐貞所不善而不為作者。以勢力取去。貞又嘗為人強之觀。

伎有蜀伶某登場明眸巧笑極諸藝賤貞望見亟壞座去昨旅邸終日不啜飲瞋目怒越日躍起叱其人曰愛男女為茲妖惑卿隨眾庸妄往觀既不自愛乃欲為有道辱既而是伶慕之度非伯宣莫能致也伶夙以任俠交伯宣因為之請不可伯宣曰果俠而義焉問其技子亦技耳吞刀吐火孰如白描寫真請觀技之真者貞顧曰子故知我我為子往貞既至是伶乃哀慕悽愴唏噓涕泗進退動容貞為終座既去輒為寫其真貽之伶欲盛其髻服貞又盛其髻服貽之伶欲一見貞卒不可伯宣以乾隆癸巳甲午間與貞同游京師伯宣歸葬亦資其力伯宣甲辰至京貞去或云已死論曰貞孝矣既心喪終身雖終身墨其衣冠不為過禮曰父母存冠衣不純素然則父母歿純素可也異乎孤子當室者也矧其不能居室者也貞既孝於親又克以其技行其義技也若此抑又深惜其技善其道技也進於道歟

王烈婦傳

烈婦王氏年二十嫁黃敬升黃氏世儒五世單傳敬升家益落崑山民俗延師師攜眷赴塾上者全家食主人次則主供其半又次師以求修自舉炊敬升訓蒙鄉塾屢試屢黜所入不足居食遂歸蹀一屨與婦守益發憤攻苦或篝鐙終夜讀婦治績共達旦敬升出市所績易食具歸付婦執炊為常敬升亦助婦績究不供爰製辟蠶樂

助活登崑山下視全城十七水草蟲起仲春月迄仲秋民居荒篁水草間少帷帳故操是業者眾饘粥仍弗繼然卒無交謫聲鄰里賢之當是時敬升少族姻王雖世家婦亦少強近母黨又甘高潔恥登人門故恒自食其力婦識字能書略通史傳敬升讀書暇或為陳古人阨窮義烈相對感慨或窮愁唏噓揮涕面壁敬升則太息掩卷出戶行及歸婦舉案甚恭或置酒慰藉故敬升處困不因婦事敬升六年生一子及期敬升死敬升死疫病甚久婦日夜治續醫藥最後剪髮求髻易錢療之而敬升竟死死以夜人無知者乾隆四十二年歲丁酉九月七日敬升門不啟外聞兒啼聲鄰壤垣入敬升斃牀中婦斃牀下兒卧地號胸擊素書婦絕命筆也言力不能殮其夫故服辟瘟藥中紅硃以殉冀惻隱者殮夫育兒身填溝壑不恨語特哀絕見者皆雪涕失聲有諸明經東源義人也立為殮其夫婦且抱兒去養桑濱某氏既而某氏與諸約不得告兒本生諸恨之終身

論曰烈婦事向既質之諸明經數請告其子明經未能也悲哉子未知其母之烈久而人焉知之雖然婦烈如此豈忍其泯沒弗傳究豈能泯沒之使弗傳也哉